

當陽縣補續志

第一冊

地志
卷二



當陽縣補續志序

歲壬午^余捧檄補續邑志距前修志時僅十餘年事蹟不多惟據所採者上聞故未梓行歷年來日增月積隨得隨錄哀然成帙將謀鉅梓余不禁顧而喜曰自來國史之修條目紛繁源委洞澈其間彰微闡幽之類罔不搜求詳註以示風化於後人矧一邑地非遼遠竅察尤易爲功乎以余前修志時證以舊志僅節孝篤行數則既而採輯又若干卷指事雖實有美亦彰而學校規模猶覺偏而不全於是竭力經營盡心培植凡有裨^益士林者無不俱舉故數年來人才蔚起比戶絃歌乙酉戊子己丑科文武報捷夫事機之發有開必先自茲以往其乘事利導必有連鑣彙征爲沮漳紫玉生色者今日之志較前志不大相徑庭也乎願或謂節固重矣孝更美德臬使李次青編先正事略一書得孝子僅七十餘人其中有刳股聞者不過十之二三夫以九州之廣

聖朝涵濡二百餘年之深其所獲如此而當邑數年來有刳肝救親之孝婦二是固名都上縣所希聞者不亦難能可貴也乎然方望溪曰聖賢之事親也亦盡其心與力之所能爲而已全受全歸嘗飫聞其語彼愚夫婦一念之誠極之殘身毀體不恤所謂大孝尊親顧如是乎馬文淵誠姪書曰吾愛之重之不願汝曹效之故予所望於都人士者恆欲處爲理學出爲名臣俾揚名顯親以追古人之孝之大且遠者而區區一念之誠無取焉時棗梨告竣因復識其言於簡端

光緒十五年歲在己丑季冬月知當陽縣事六安李元才撰

當陽縣補續志

卷首

序

宜昌印書館承印

補續當陽縣志序

藻臣仁憲之蒞茲土也十有一年矣其視當邑如家然邑之人亦戀戀如赤子之依父母深恐仁憲舍諸懷而他去蓋其實心實政有以入民寤寐者深而非一二言辭所能形然即其可形者形之亦非俗吏所能爲也夫士習民風之古若豈盡運會日下哉法積久而弊生上之人不能因勢補救耳自 仁憲下車後切切以興利除弊爲己任門丁撤之胥吏減之緩催科而慎簡訟牒其牙角細故恆諭紳耆排解以釋其嫌故比年來政簡刑清幾於比戶可風矣至捐俸育士如增膏火添賓興給試卷諸善政則又無美不備尤可感者新生印卷一事款鉅費重措辦維艱 仁憲不憚數年勤勞集資置產俾遊庠者無絲毫顧慮^真每一念及但恨早生數十年春華虛度遇此遭際而心長髮短未免耿耿不釋耳前 仁憲奉檄續修縣志任^真以分編之役局中諸先生囑^真識一言於簡端^真自揣謏陋附驥尾已深抱歉何敢承讓不辭顧有不能已於言者憶^真少應童子試時露坐縣署廊簷間湫隘囂塵文思輒爲風雨所敗爾時買座有費投名有費案房學署費更不貲試未終而資斧已告罄矣今幸逢 仁憲曲意培植纖悉俱備應試者但持數日糧即可鏖戰名場以歸若平昔雍容筆硯又別無支絀以紛誦讀心坐此惠風時雨之中而不爭自拔濯勉圖上進以仰副 仁憲作人之雅意是坐廢盛時也蘇長公云得君如此何忍負之^真雖白髮種種而一息尙存此志未懈敢不勗我同人相與共勉乎哉

光緒己丑仲月治下晚生李葆貞謹識



補續當陽縣志序

宇宙間山川積鬱磅礴之氣鍾之於人顯則爲名臣爲碩儒麟也炳也蔽家黼國隱則爲篤行爲奇節堅貞潔烈之操亦足式浮而振靡故名公卿之經天緯地與愚夫婦之苦詣孤心品誼各殊其與日月爭光則一也當陽爲荆楚名區玉泉紫蓋蒼鬱綿亘沮漳清溪諸水縈洄如組練昔人謂風景略似豫州洵不誣也予於己卯歲奉

天子簡命蒞任茲土見夫桑麻遍野民氣純樸美錦學製予深幸焉特文風未暢每屆大比諸生率觀望不前爰召集紳衿商所以鼓舞振興之而比年來賓興有加矣膏火有增矣卷價考費有出矣且修金贄敬爲新生謀印卷者捐輸又將告成士生其間感發激厲爭求聞達巍科上第豈不可跂足俟乎今歲春

上憲檄修縣志以備通志之摘取因囑邑之有學行者廣爲採訪勤加蒐討編次之餘復取前志一一印証之覺山川之勝方物之殊戶口賦役之繁簡寺觀古蹟之廢興閱時不多筆削易就惟篤行奇節挺堅貞不拔之操者則比比相望層見迭出而不窮因不禁有感焉古今來節孝之後篤生偉人斷機畫荻無論矣

國朝如湯文正畢秋帆其尤著也蓋貞下起元寒極生春其理昭然不爽而况膏火賓興諸鉅典所以培植士林作育人材者無不歷歷畢舉乎異日者山川積鬱磅礴之氣與閭里艱苦卓越之行網緼交達其雲蒸霞蔚而起者則必煥爲文章發諸經綸不獨潛德幽光足以照耀史冊已也然則此一役也雖距修舊志之時僅十餘年而續先啓後獲食福報於將來也庸有冀乎因聊撰數語附諸簡端以爲都人士左券之操

光緒八年冬知當陽縣事六安李元才撰

當陽縣補續志

卷首

序

一一

宜昌印書館承印



當陽縣志

補續姓氏

主修

特授當陽縣知縣李元才安徽六安州人

協修

當陽縣學教諭蕭風儀來鳳貢生

當陽縣學訓導洪安瀾蕪湖水舉人

分編未梓

舉人王金鍊

恩貢江榮枬

貢曹沐三

分編

恩貢李葆貞

監局

孝廉方正陶賡唐

當陽縣補續志卷首

姓氏

三

宜昌印書館承印

貢生羅忠蓋

庠生胡映南

參訂

舉人徐中銓

貢生高士楷

拔貢羅毓衡

分校

貢生曹華國

庠生郭廷輝

探訪

貢生徐朝楷

貢生王金銳

貢生張瑞紳

貢生張銘西

貢生鄭宗星

先緒八年至十五年兩次探訪



庠 庠 庠 庠 庠 庠 庠 庠 庠 庠 庠 庠 庠 庠

庠 庠 庠 庠 庠 庠 庠 庠 庠 庠 庠 庠 庠 庠

生 生 生 生 生 生 生 生 生 生 生 生 生 生
劉 徐 陶 劉 尙 王 汪 汪 羅 羅 曹 傅 鄭 張 袁
輝 向 耀 丙 攀 化 楚 培 希 心 樹 彌 映 青 椿
章 陽 南 寅 桂 麟 湘 厚 彥 德 聲 金 輝 選 山

生 生 生 生 生 生 生 生 生 生 生 生 生 生
王 王 徐 趙 張 盧 胡 羅 張 張 張 李 彭 林 羅
紹 步 中 金 若 玉 逢 伯 映 金 天 登 栖 輝
連 香 興 相 金 敏 蘭 源 謙 奎 鑑 保 甲 鳳 光

當陽縣補續志

卷首

姓氏

五

當陽縣補續志

卷首

姓氏

六

宜昌印書館承印

庠 庠 庠 庠 庠 庠 庠 庠 庠 庠 庠 庠 庠 庠 庠

生 生 生 生 生 生 生 生 生 生 生 生 生 生 生
劉 向 劉 劉 陳 朱 敖 彭 席 陳 程 朱 高 鄧 高
春 龍 含 光 芸 映 慶 德 聯 煥 良 勉 志 義 志
靈 光 章 瑩 香 木 雲 榮 輝 之 玉 之 伊 芳 德

庠 庠 庠 庠 庠 庠 庠 庠 庠 庠 庠 庠 庠 庠 庠

生 生 生 生 生 生 生 生 生 生 生 生 生 生 生
王 曹 劉 張 高 周 楊 雷 謝 張 楊 陳 宋 傅 李
耀 宗 宗 鵬 丙 兆 金 霈 樹 景 炳 精 翔 作 懷
南 文 錫 霄 暉 鸞 聲 霖 榮 昌 奎 一 鳳 梅 清

庠 庠 庠 庠 庠 庠 庠 庠 庠 庠 庠 庠 庠 庠 庠

生 生 生 生 生 生 生 生 生 生 生 生 生 生 生
萬 彭 湯 汪 唐 齊 姜 胡 李 李 史 周 陳 席 傅
精 德 鵬 煥 暉 國 行 長 湘 慶 位 玉 丙 梁 文
一 元 翊 新 南 枏 乙 庚 傑 蓉 三 森 圭 輝 釗

當陽縣補續志 卷首

姓氏

七

宜昌印書館承印

庠 庠

生 生
姚 周
啓 日
琳 庠

監刻志版

從

九

品

銜 徐 培 榮

當陽縣志

補續凡例

一補續縣志距前修志時僅二十餘載創建事少仍依前志分列十二門有續者續之無續者仍之其有補前志所無者亦各從其類而已

一選舉門文選一類政典門印卷一類均係補前志所無餘皆接續前志其無續者惟武備

一門足見太平日久劍戟悉鑄爲農器也

一前志告竣後復採有事跡因梓又補遺一帙以續之而寥寥短章未克成卷今分類彙入補續志內鏟去卷尾數則庶前後不至錯亂雜出

一文廟列祀典門學宮宜依類相從而舊志雜入政典門致前後不相聯屬今改移祀典庶不兩歧

一補續志依舊志十二門作四卷一卷首方輿次建置次政典有土此有財有財此有用卽富然後教意也二卷首祀典次祠宇次職官次選舉次人物誠以行誼者聖賢之始基聖人者人倫之極致也三卷專志列女以闡幽光四卷專志藝文以彰潛德然物必雜始成文故以雜錄終

一志內事蹟有爲本年採輯者有爲前數年採輯者至所編舊志又補遺數條且在二十年

當陽縣補續志

卷首

凡例

八

宜昌印書館承印

以外凡有現年若干歲均係隨採隨書幸勿刻舟以相求

一斯志既曰補續似宜各續各類因去續修時未久棗梨鏗然并作一冊未免糜費有識者諒之



補續當陽縣志目錄

首卷

序

修志姓氏

凡例

目錄

圖

卷一方輿志

古蹟

山川

祥異

建置志

城池

街衢

津梁

公署

坊表

雜建

堤防

政典志

戶口

社倉

書院

書屋

膏火

卷價

賓興

思樂

卷二祀典志

文廟

武廟

文昌宮

祠宇志

古祠

寺觀

職官志

當陽縣補續志

卷首

目錄

九

宜昌印書館承印

令佐表

循良傳

儒學表

武職表

選舉志

薦舉

貢生

文選

武科

武選

雜選

世職

人物志

宦蹟

友孝

忠義

篤行

文苑

耆壽

流寓

卷三列女志

節婦

烈婦

孝婦

貞女

賢母

壽母

卷四藝文志

記

引

言

賦

傳

序

贊

五古

七古

五律

七律

五絕

七絕


詩餘

雜錄

叢談

補遺





社倉圖


當陽縣補續志

卷首

社倉圖

社倉圖





玉陽小學書屋圖


當陽縣補續志

卷首

玉陽小學書屋圖

二





當陽縣補續志

卷首

賓興館圖

三

宜昌印書館承印

賓興館圖



新雲路

北辰居所


當陽縣補續志

卷首

賓興館圖

四

宜昌印書館承印



當陽縣補續志卷一

方輿志

古蹟

糜夫人井在治西里許蹤跡不可考

太子橋在治西長坂坡下趙常山救後主處

漢壽亭侯墓道碑在治西長坂坡上明萬歷丙子夏日立

玉泉顯烈祠前有石表高一丈有奇四方各徑一尺一寸正面刻漢雲長顯聖處六字

旁刻當陽縣知縣吳

士忠主簿徐上選典史

開應庸同立二十字左面刻當陽縣知縣今陞福建建寧府同知李一陽十七字右面刻興都留後

參軍署當陽縣印潘雲章題十五字背刻萬歷丙辰年孟秋月吉旦建立十二字

按玉泉顯烈祠對峙中隔一溪通以榭橋珠泉經其下亦勝景也

胡文定公墓道碑在治北二十里清水塘同治六年縣令鍾傳益建

孝子碑在尖山西南境舊傳為陳氏碑道光丙午年增生沈瑞林路遇起視之上鑄陳孝子處

四字餘模糊既而文生陳煥之重刻以紀其蹟

邑侯李公德政碑在治東龍神祠前光緒十二年四總士民建

山川

當陽縣補續志

卷一

方輿 蹟古山川祥異

一

宜昌印書館承印

泉河在小蓮總魏家板平地湧出東西對溢合流入澗溉田無算由東南達三叉河入于江

祥異

光緒六年四月二十一日平原出水沮漳泛濫淹沒人畜甚衆

十五年六七兩月沮漳二河蛟水泛漲數次兩岸禾苗人畜多被淹沒沙倒淤泥等處更甚



建置志

城池

縣城光緒十一年知縣李元才捐俸補修

街衢

老河新街自西門外望兒坡下至河

文明通衢自東門內文昌宮至大魁閣

津梁

欄杆橋在治東二十五里光緒丙戌年沙溪總紳耆募資創建

三善橋在治西二里許光緒十四年縣令李元才倡捐鼎建

迴龍翹鳳望鵠駐馬諸橋在關陵四維各里許久圯咸豐初漳鄉總紳楊國立募建望鵠一橋

立旋故光緒十四年總紳耆及廟僧募建迴龍翹鳳二橋修補望鵠橋惟駐馬橋闕如

公署

縣署光緒七年縣令李元才增修東花廳三間重修頭門儀門大堂二堂坐樓二堂前左右門

房各三間大堂前左右科房八間儀門內左右班房六間土地祠三間照牆一座

坊表

當陽縣補續志

卷一

建置

城池街衢津梁公署

一一

宜昌印書館承印

希聖育賢二坊在學宮前左曰希聖右曰育賢久廢光緒十四年知縣李元才復建

雜建

迴峯塔在治東南五里玉泉入沮處嘉慶元年廢同治辛未年縣令鍾傳益倡捐復建

福佑局在北門內大魁閣旁同治十二年城鄉紳耆置並置田數處設義學一堂即以田租作

義學資豎有碑記

堤防

鄭公堤道光六年夏大水堤壞縣令牛夢現重修光緒六年四月二十一日蛟水肆毒堤潰十

餘丈縣令李元才倡捐補修頗稱完固餘資置禾田三畝坐落傅家崗碑亭右田付姑甥壻之

壻頭承種每年秋穫後浚溝束壻水以灌城濠卽以此租作修溝資

政典志

戶口

光緒元年造報民數三十一萬九千八百四十一口
光緒五年造報民數三十二萬四千六百七十六口
光緒十年造報民數三十二萬九千二百八十五口
光緒十五年造報民數三十三萬一千五百八十九口

社倉

社倉在東門內文昌宮後面北光緒七年縣令李元才倡首鼎建後構神樓三間內置倉三座前構大廳三間內置倉二座左右兩廊各七間分置倉十四座外立有照牆開東西二門因歲修無資門左右復構舖屋二所以所收租錢備之

按社倉舊本在鄉領以各總倉長圖便民也至法久弊生黠者居爲奇貨懦者畏如陷阱抵冒侵欺爭訟不已 邑侯李公欲除其害適奉 藩憲察倉之檄因卽改建新倉之意以上覆之旋諭城鄉紳耆集資若干於城中建一總倉俾倉長各將所存穀數盡運入總倉聚儲之節次收穀四千二百餘石復捐俸三百串置屋收租以資歲修自此變通後而四鄉果安堵無爭不可謂非法之善者也若夫因時制宜或糶或貸後之任是邑者不患無術處此矣

當陽縣補續志

卷一

政典 戶口社倉書院

二二

宜昌印書館承印

餘詳藝文內建倉記

書院

玉陽書院仍改爲迴峯書院頭門內左右廂房久圯光緒四年縣令陳樹楠倡捐改修圍牆七外構鋪面二所光緒七年縣令李元才重建主敬堂三間復砌堂下左右花牆二座牆各開一圓門東曰敬業西曰樂羣

書屋

玉陽小學書屋在北門內玉陽山麓同治十二年縣令謝家蘭倡捐鼎建座樓三間左右二廂房未竣光緒元年縣令周鴻英捐俸二百串續修前廳三間

新增膏火公田

板總田家坑水田七石縣令阮恩光諭捐存典之錢於同治六年置

每年驗籽稞穀二十八石

清洋總胡家柳朴水田十石八斗縣令阮恩光諭捐存典之錢於同治六年置

每年驗籽稞穀四十三石

以上水田二分係舊志載同治四年縣令阮恩光存典生息錢一千八百串所置

黃石總北坑水田三石何家坑水田三石同治十一年簡夏氏簡天祥捐充

每年預支租錢十四串四百文

黃石總南坑松林灣水田七斗同治十三年簡夏氏簡天祥捐充

每年預支租錢四串

上總長坂坡水田五石二斗光緒元年增生萬文瓚之妻羅氏議捐書院內有議捐碑記

每年預支稞錢二十串

謝柏總李家臺坦堰水田三石三斗監生郭鳴謙捐當價錢三百串光緒五年置

每年預支稞錢十串

書院左右舖面二所

當陽縣補續志

卷一

政典 火膏公田

四

宜昌印書館承印

每年佃錢十二串

又光緒十三年冬縣令李元才捐俸二百串並撥思樂館錢二百串作本生息以為增補膏火之資

按書院束修膏火章程隨時增益詳見碑記

州院卷費公田

黃石總中一甲泰山廟水旱田八石光緒三年置

每年預支稞錢三十八串

黃石總右龍坑水旱田十二石五斗光緒三年置

每年預支稞錢六十串

洪市總晏子坑水旱田五十畝光緒三年置

每年預支稞錢四十串

板總田家坑水旱田七石五斗光緒三年置

每年預支稞錢三十二串

黃石總東一甲水旱田十二石光緒三年置

每年預支稞錢四十四串

黃石總東一甲葉姓水旱田七石光緒三年置

每年預支稞錢三十串

洪市總鄭公堤外旱田九畝光緒三年置

每年預支稞錢十串

當陽縣補續志

卷一

政典 縣州院卷費公田

五

宜昌印書館承印

鴻橋總井溝河水田三石五斗光緒四年置

每年預支稞錢十三串

按卷價舊係楊公興捐錢四百串復撥文昌宮錢一百串存典生息以作州試頭場之資光緒二年邑侯周鴻英將此項改作院試另集閩邑紳首募資籌辦州試五場卷價置田如前擬定州試頭場縣結州票共需錢九十串二場四十八串三場三十六串四場十九串二百末場十二串通共計錢二百零五串二百文至武童縣州院三場每次需錢一百吊其有求覆補考仍由各童自備卷費餘詳碑誌

賓興

賓興館在城內二總大魁閣東後抵城牆前向正街舖面三間廂房二間前廳三間設倉四座廂房四間正廳三間後廂房二間廚房三間後院一所光緒七年經管賓興衆紳首置

賓興公田

清洋總易家壩水田十石光緒三年置

每年驗籽稞穀二十八石

洪市總余家坑七石五斗同治十二年置

每年驗籽稞穀二十四石

乾溪總官田陸田二十三畝三分同治年間鞏河總楊斂之捐充

每年預支租錢二十三串三百文

黑龍總龍王廟北羅家坑水田一分係高嗣萬捐充

每年預支租錢八串

黃石總東一甲水田七石光緒六年置

每年驗籽稞穀二十六石

洪市總莊家洲禾田二十六畝五分光緒六年置

每年預支租錢十八串四百文

黃石總東一甲水田六石光緒六年置

每年驗籽稞穀二十四石

當陽縣補續志

卷一

政典 賓興公田

六

宜昌印書館承印

漳鄉總胡家凹朝北灣水旱田一分光緒六年置

每年驗籽稞穀二十二石

深港總瓦窰坑水田五石光緒六年置

每年驗籽稞穀十五石

漳鄉總朝北灣禾田三畝五分水田六斗光緒六年置

每年預支租錢五串

謝柏總仙女廟水田四石光緒七年置

每年驗籽稞穀十六石

易家總劉家榜水陸田十五石三斗光緒七年置

每年預支租錢六十一串

漳鄉總水田一石二斗禾田七畝光緒十三年置

每年驗籽稞穀四石八斗預支租錢十串零五百

普濟寺田三十石海堰總光緒八年寺僧繼舉捐

每年預支租錢八十串

光緒五年紳首王丙壽高士純等稟請向沈義捐存典之錢六百串撥入賓興公收息如書院有山長住院司業則饋錢八十串不住院司業仍歸賓興項下動用奉憲 批如稟立案書院內豎有碑記

按舊志載鴻橋總琵琶洲水田二石光緒三年縣令周鴻英准賣主照原價贖回董公書院內有贖取碑記此款合原存生息之錢均已增置田產

思樂館

士無贄不見禮有明文自世風日下禮教也遂變爲利途矣後生入學謁師借束修爲口實每搦家資之肥瘠以索贄敬之多少師道不尊非一日也當邑壤地僻陋生多寒峻采芹食餼時師弟輒形齷齪七孰謂名教中有樂地乎 邑侯李公惻然憫之集資籌款俾新生咸遂其樂因取魯頌泮水之句而以思樂名館焉置田若干詳列於左餘載本館章程冊內

思樂公田

海堰總田一分計十六石五斗光緒九年置

每年驗籽稞穀七十石

謝柏總水田十一畝四分九釐光緒九年置

每年驗籽稞穀八石八斗

清洋總田一分八石八斗光緒九年置

每年驗籽稞穀三十二石

清洋總田一分二石七斗光緒九年置

每年驗籽稞穀九石

清洋總田一分三石光緒九年置

當陽縣補續志

卷一

政典 思樂公田

七

宜昌印書館承印

每驗籽稞穀十二石

清洋總田一分三石二斗光緒九年置

每年驗籽稞穀十二石八斗

清洋總田一分一石九斗光緒九年置

每年驗籽稞穀七石二斗

謝柏總田一分一石光緒十年置

每年驗籽稞穀四石

清洋總田一分十石光緒九年置

每年驗籽稞穀三十四石

榴花總田一分五十四石四斗八升五合五勺

又田四石七斗五升光緒十年置

每年共計預支稞錢二百三十串零八百九十文

瓦窰總田十畝光緒九年置

每年預支稞錢十八串

瓦窰總田一分九畝光緒九年置

每年預支租錢十六串

漳鄉總田一分六畝六分光緒九年置

每年預支租錢八串五百文

胭脂總水田四石禾田十八畝光緒十年置

每年預支稞錢四十四串

漳河總田一分十六石光緒十一年置此田隔城太遠原議將來準其自續

每年預支稞錢一百二十串

金沙總田一分一石一斗光緒十一年置

每年預支稞錢四串

清洋總田一分二十一石六斗光緒十一年置

每年預支租錢六十串

洪市總田一分七石一斗光緒十一年置

每年預支稞錢二十三串

易家總田一分八石光緒十二年置

每年預支稞錢三十二串

當陽縣補續志

卷一

政典 思樂公田

八

宜昌印書館承印

普通總田一分十九石光緒十二年置

每年預支稞錢六十六串

週二總田一分四石二斗五升光緒十年置

每年預支稞錢十一串

普通總田一分十三石光緒九年置

每年預支稞錢五十串

清洋總田一分四石光緒九年置

每年驗稞穀十六石

按此項原議置產量入以為出計垂久也然又恐旱乾水溢入不敷出故於買田二百一十餘石外餘錢七千串存典及殷實戶生息以備不虞如年久利豐仍以置產為歸至每年按按季屆用款並羨餘詳載本館章程冊



當陽縣補續志卷二

祀典志

文廟

同治十三年縣令楊應桓重修啓聖祠大成門禮門義路牌坊暨明倫堂光緒十四年縣令李元才募資重建大成殿大成門泮池左右兩坊東西兩廡啓聖祠明倫堂左右義路禮門及周圍垣牆

東廡先儒

張履祥

位孫奇逢之次

許慎

位后倉之次

張伯行

位陸隴其之次

陸世儀

西廡先儒

袁燮

位呂祖謙之次

劉德

位董仲舒之次

輔庚

位黃幹之次

文廟表

封諡

題額賜予附

祀典

以袁燮從祀

立學

國朝 同治七年

當陽縣補續志

卷二

祀典

文廟

宦名祠定公祠

宜昌印書館承印

十一年

以張履祥從祀

光緒元年

勅懸

御書斯文在茲額於天下

二年

以陸世儀許慎從祀

三年

以劉德從祀

五年

以張伯行從祀

六年

以輔庚從祀

名宦祠

國朝

董文煜

朝邑舉人光緒十二年入祀

胡文定公祠同治六年縣令鍾傳益重修並敦勸士民捐錢二百串生意添設民祭每年秋後官紳奉祀一次以其息作歲修齋夫祭費之資又於基左清水塘豎立基道碑



武廟

關聖陵廟同治五年宜昌安總鎮稟請籌款重修

中丞郭柏蔭飭委張倅東甲劉令宗元劉主簿繼燠重修 陵墓亭銅殿殿前左右廊兩亭
大殿拜殿殿前左右畫廊馬殿左右鐘鼓樓三元門左右角門佛堂伯子祠八角碑亭啓聖
祠春秋閣碑亭客堂齋宿所周圍垣牆七年八月興工八年四月告竣伯相李鴻章藩司何
璟均有重修碑記同治十年縣令鍾傳益敦勸該總紳民程春榮等捐置田畝酌議供應每
年春秋二仲月與祭各官隨從兵役等飯食章程稟奉 上憲核定泐石於廟十一年縣令
戴開基修葺銅殿光緒元年縣令周鴻英補修春秋閣紅牆數處七年縣令李元才集歲修
資修銅殿春秋閣碑亭柏子祠紅牆數處十年重修春秋閣拜殿官廳前後走廊十三年修
葺銅殿八角亭碑亭春秋閣柏子祠週圍紅牆

封號題額對賜予

嘉慶 年奉

勅懸

御書靈威攸宅額

封樹依然明裡崇奔禩

當陽縣續補志

卷二

祀典

武廟

文昌宮

二

宜昌印書館承印

威靈儼若浩氣壯乾坤對道光 年奉

勅懸

御書聲靈如在額咸豐 年奉

勅懸

御書萬世人極額六年奉

勅加封精誠七年奉

勅加封綏靖同治九年奉

勅加封翊贊

勅懸

御書威震華夏額光緒六年奉

勅加封宣德

文昌宮

文昌廟宇同治十年縣令鍾傳益諭捐重修殿後新建青雲閣啓聖祠祠前左右廂房周圍垣
牆

祠宇志

古祠

赤帝宮在縣城南門內文昌宮右同治十年縣令鍾傳益募資鼎建正殿三間拜殿三間僧房數間光緒七年縣令李元才諭捐續建山門及大觀樓一座殿後舖面一所北臨正街文星樓在清溪下街光緒丙子年縣令周鴻英諭清溪紳商捐資鼎建呂祖閣在治東北三十里瓦窰總同治十二年縣令謝家蘭諭紳耆鼎建餘資置田閣內豎有碑記

寺觀

天符廟在城外東南隅同治五年縣令阮恩光倡捐重建

當陽縣補續志

卷二

祠宇 古祠 寺觀
職官 令佐

三

宜昌印書館承印

職官志

令佐表

同治五年	九年	十一年	十二年	十三年	光緒元年	四年	五年	六年	八年
曾紀瓚 湖南人監生代理	鍾傳益 福建武平人道光甲午副榜 咸豐元年孝廉方正補授	戴開基 貴州平越人辛酉拔貢署任	謝家蘭 貴州正安人丁酉拔貢署任	傅鍾漢 湖南湘鄉人戊午舉人補授	楊應桓 江蘇金匱人己酉舉人署任	周鴻英 四川巴縣人選授	陳樹楠 陝西鄠縣人辛酉進士署任	李元才 安徽六安州人同治癸酉拔貢補授現任	
	陳元章 直隸宛平人代理			劉漢釗 四川人現任					
		陳凌衢 江西德安人附貢生	陳鈞 陝西三元人					陳正柏 湖南永定人	李煥章 陝西渭南人現任

令

巡

檢

典

史

循良傳

董文煜字質生陝西朝邑舉人舊志有傳光緒十一年十二月內撫部院彭題奏已故原任當陽知縣董文煜治績事實一摺於十二年二月內奉旨依議欽此相應抄錄原奏知照湖北撫部院裕札飭當陽縣遵照奉行入祀名宦祠
王朝枏字讓生四川璧山人道光十四年以翰林院庶吉士宰當邑明敏剛直以廉能稱時私鑄盛行公嚴為改革宿弊立除至培學校葺書院置膏火建修文昌宮尤為士林所瞻仰十九年奉調麻城士民咸攀轅焉
任道鎔字筱沅蘇江宜興人已酉選拔咸豐九年蒞任當邑舉止閑雅器宇宏深判訟明允寓忠厚於刑賞不縱不擾民咸愛戴之同治元年奉調順德府于民感泣者衆後任至山東巡撫

當陽縣續補志 卷二

職官

循良傳 儒學表

三

宜昌印書館承印

儒學表

教諭

訓導

同治六年

魯學鎔 江夏人庚午舉人署事

沈長禧 松滋人廩貢生選授

九年

陳懋森 蘄州人廩生署事

劉貞幹 崇陽人歲貢選授

光緒元年

李應春 通山人癸酉拔貢選授

三年

亢兆彬 襄陽人丁卯解元署事

王汝霖 咸甯人癸酉舉人署事

八年

賀萬春 天門人貢生署事

十一年

蕭風儀 來鳳人 恩貢選授現任

十三年

易祥光 公安人廩生署事

胡毓英 武昌人附生考取教習署事

周 芬 通城人 恩貢署事

熊文駿 松滋人廩生署事

洪安瀾 蘄州人壬戌舉人選授現任

武職表

同治	守備	千總	把總
光緒		王超然 <small>遠安人行伍補授</small> 劉如義 <small>陽陽人行伍補授</small>	李成棟 <small>遠安人行伍選授</small> 趙廷凱 <small>宜昌人行伍補授</small> 魏盛明 <small>遠安人行伍署事</small> 曾光耀 <small>遠安人行伍補授</small>

當陽縣續補志

卷二

職官 武職表 選舉志 舉人貢生

四

宜昌印書館承印

選舉志

舉人

乾隆

癸卯 向志甲

同治

丁卯 劉有尉

光緒

丁亥 陶賡唐 孝廉方正

杜熙春 孝廉方正

戊子 徐中銓 乙酉拔貢 順天鄉試

貢生

嘉慶

郭世曾

文望

道光

郭紹道

同治

賀繩

曹汲三

嚴有煦

熊叶兆 恩貢

羅忠信

羅毓衡 癸酉拔貢

光緒

曹沐三 恩貢

李葆貞

文溥堂

曾東明 恩貢

徐朝楷

江榮枏 恩貢

王金銳

張瑞紳

張銘西

徐中銓 乙酉拔貢

鄭宗星

文選

明 建文

李讓 甲申進士任大理寺評事廣東右參議

向志安 壬午舉人江西建昌府教授

洪武

劉煥 貢生山西按察副使

張濟 貢生刑部員外郎

何毅 貢生漳州府知府

劉謙 貢生戶部員外郎

永樂

向志 戊子舉人四川井鹽訓導

朱玉 甲午舉人應天府尹

蔣賢 貢生恭城知縣

成化

當陽縣續補志

卷二

選舉 文選

五

宜昌印書館承印

胡瀨 貢生清江知縣

胡格 貢生黃州訓導

正德

張欽 貢生知縣

鄭儼 貢生彭山訓導

嘉靖

姚會 己酉舉人南溪知縣

張楠 乙卯舉人直隸宿松知縣

聶武 丁卯舉人陝西富平知縣

許翔 貢生考授知縣

車星 貢生鹽井衛教授

萬曆

李應麟 乙酉舉人四川井鹽知縣

周際明 戊子舉人廉州推官

龔仕 貢生巴東訓導

陳 旨 貢生安陸教諭

史希楚 拔貢知縣

吳九思 貢生黃岡訓導

謝 滋 貢生沈邱教諭

李 家 貢生零都教諭

周宏模 貢生順慶府教授

劉家相 貢生饒州教授

李 深 貢生崇陽教諭

黃大中 貢生蕪江教諭

梁國相 貢生彭澤教諭入祀鄉賢祠

梅遇春 貢生蒲圻教諭

王 僖 恩貢遷安縣令

王 任 貢生竟陵訓導

天啓

金大赤 貢生甯州訓導入祀忠義孝友祠

當陽縣續補志

卷二

選舉 文選

六

宜昌印書館承印

崇禎

汪士傑 庚午舉人山西靜樂知縣

李大年 癸酉舉人永州教授

郭之都 丙子孝廉新甯教諭

歐陽煥 貢生考校知縣

陶大賢 貢生湘潭訓導

殷 萃 貢生安陸教諭

金門彥 貢生襄陽教諭

國朝

順治

陳其美 壬辰進士司理浙江處州

楊州彥 己亥進士直隸任邱知縣

廖養義 貢生枝江訓導

詹 南 貢生新田教諭

梁山金 貢生甯國知縣入祀鄉賢

范文叔 貢生永州訓導

康熙

游逢盛 戊午舉人授內閣中書

陳士敷 丁丑進士福建歸化知縣

謝永聰 甲午舉人澄州學正

范文英 貢生通山訓導

陳廷璧 貢生辰溪訓導

李作朋 副貢羅田教諭

梁 晟 貢生通山教諭

李明賡 拔貢雲夢教諭

汪 墀 貢生辰溪訓導

葛祺賢 拔貢雲夢教諭

黃中行 貢生遠安訓導

周卜年 貢生黃安訓導

李通理 貢生石首訓導

當陽縣補續志 卷二

選舉 文選

七

宜昌印書館承印

牛天宿 貢生公安訓導

雍正

朱 樞 癸卯舉人東湖教諭

文汝濂 癸卯舉人涇州知縣

郭孫俊 庚戌進士授刑部山東福建清吏司主事改授江西都昌知縣

宋楚望 癸丑進士江南常州知府

金秉祚 拔貢江南穎州知府

乾隆

林可法 辛酉舉人仁化知縣

金維岱 壬申進士翰林院檢討

嚴 岱 貢生郟西訓導

龔應奎 貢生德安訓導

鄭崇仁 貢生監利訓導

趙 瑄 貢生南漳訓導

張定謨 貢生雲夢訓導

向志甲 癸卯舉人山西興縣知縣戊午科同考試官

李傑臣 貢生利川訓導

嘉慶

徐文翰 山西知縣歷署十三縣一州補岳陽縣有傳

徐開裕 辛酉拔貢巴東教諭有傳

道光

王敬修 歲貢嘉魚教諭

咸豐

王金煉 丙午舉人蒲圻教諭嘉魚教諭

同治

汪南金 恩貢房縣訓導

林榮 廩貢生京山教諭

杜映藻 廩貢生黃梅訓導署大冶教諭

楊欽之 歲貢石首訓導

廖培蘭 歲貢署西教諭宜昌府學教諭

當陽縣續補志 卷二

選舉 文選 武選

八 宜昌印書館承印

按舊志科甲則行藏並著間或載其官於某科名下官蹟則文武雜錄至有官而無傳者概等闕如仰止高山殊覺惘然茲做舊志武選例另立文選一類在官者志官自詞林以訖俊秀科第之高下弗計也其有官而候選者不與即由正途而改佐貳者入雜選此選亦不與庶後起者有所觀感云

武科

嘉慶

嚴懿華 辛酉科

光緒

阮坤元 乙酉科

阮乾元 己丑恩科

嚴懿華 辛酉舉人任兩河口千總

雜選

明永樂

向文 貢生無錫縣丞

何銘 貢生慶府典儀

姚廷用 監生衛輝府通判

正統

劉英 貢生布政司檢校

劉佐 貢生濟南府檢校

唐禮 貢生上高縣主簿

鄭經 貢生分宜縣丞

周冕 貢生歸安縣丞

成化

馮亮 貢生甯光州判

趙旭 貢生唐縣主簿

何源 貢生宜賓主簿

當陽縣補續志

卷二

選舉 雜選

九

宜昌印書館承印

向士廉 貢生順慶府通判

李賢 貢生崇甯主簿

尙達 貢生漂水主簿

劉宣 貢生重慶府檢校

陳禎 貢生弋陽主簿

宏治

江潮 貢生汀州照磨

賀表 貢生息縣縣丞

曹鼎 貢生桐廬縣丞

甯璽 貢生成都府經歷

正德

曹鸞 貢生太平府經歷

黃榮 貢生華亭主簿

李長春 貢生理問

萬歷

劉東魯 貢生鹽城縣丞

葛希賢 貢生浙江紹興通判

馮世濂 貢生浙江仁和縣丞

國朝

順治

范念祖 恩貢松江府同知

周敬修 貢生山東益都縣丞

張吉宿 貢生山東德平縣丞

乾隆

符國瑾 貢生安州吏目

光緒

張宗旭 辛酉拔貢四川直隸州州判

張宗海 廩生湖南巡檢

世職

關聖裔世襲五經博士

關啓端 孫傳長子同治七年承襲

當陽縣續補志 卷二

選舉 雜選 世職 人物 宦蹟

人物志

宦蹟

汪南金號鍊齋邑恩貢秉性正直學養兼優同治間選授房縣教諭解組後主迴峯書院講席成名者衆族黨均賴維持子培鑑附貢培厚孫潤生俱邑庠咸謂其教有義方焉享年七十有三

廖培蘭邑歲貢家赤貧辛酉拔萃科朝考報罷猶銳意進取因秋闈屢蹶遂就州判職分發四川試解組後貧如故年七十餘而終

張宗旭號寅谷登辛酉拔萃科朝考報罷猶銳意進取因秋闈屢蹶遂就州判職分發四川試用州縣慕其賢聘掌文衡者不一而足迭主二酉鹿巖二書院講席尤受沈壚青太守知文卷書札課試皆倚辦焉未幾沈陞授甘省安肅道邀旭往幾歷萬里旋奉川藩檄權汝川縣茶稅接委西充鹽亭二縣鹽務戊子科調辦闈差畢卒旅邸同官惜之賙甚厚時年四十有九

孝友

徐忠玉號藍田性肫誠謹厚寡言中年失恃事老父羹湯親調不假手於人侍疾數月不解帶弟二俱年踰六十猶和靄相接有大被同眠之風子孫數十人同炊共飯無一間言前縣令鍾以孝友克敦表其門

張有美字如玉天性純篤父監生必斗早卒事母靳氏極孝母病湯藥必躬親母飯已乃飯延師教子禮遇優隆子啓春府知事銜恂恂儒雅好善樂施孫厚存廩生道存心存邑庠

杜廣成性謹厚事嗣母傅氏以孝聞傅七十病盲成周旋扶持必躬親雖家貧屢空而菽水承歡歷年不倦孫鴻藻鴻儒俱列庠

郭宗德邑仲賓性純和事親甚篤諸父析居有力有不足者德延至其家養葬皆如其父弟蕃周爲擇師教之以英年補弟子員子蔭壽能承父志

杜齊峴邑介賓性端嚴舉動必遵禮法事親尤篤父與叔白頭友愛同居一堂峴溫清定省事之如一伯父兄弟六峴延師教之皆學成名立季弟映藻以廩貢歷署黃梅廣濟教諭子熙春由附貢登孝廉方正科里黨榮之

張萬懋字敦勉性醇謹少失恃事繼母以孝聞偶觸母怒必長跪俟霽顏乃起執父母喪哀毀骨立孫鵬霄庠生

當陽縣補續志

卷一

人物 孝友

十一

宜昌印書館承印

曹邦愷邑從九秉性冲和尤敦孝友髫年出嗣二房及長諸伯叔皆物故諸母動相牴牾愷委曲調劑必使其歡心而後止四房中絕嗣者三愷以諸孫繼之且遵先祖世煥志修宗祠立墓碑使一族皆重其所出推廣孝思如此及卒人皆思之

文童馮漸遠貧不廢讀事親常得其歡心父病彌留割股和藥以進尋愈兄性拘達接以婉容和好無一間語里人皆賢之

傅天佑之子貴禮甫九歲運匪入境父以鄉勇殉難已祀入荊門州昭忠祠佑事孀母無違禮鄉黨以孝稱母享年八十三節登縣志忠孝節義萃於一門如此

郭蔭壽字樾生邑監生少失怙事母曲盡孝道侍寢問安不離左右母目盲壽日以舌舐之數年不倦母目復明鄉黨皆稱其孝縣令周詳申 上憲奉旨旌表

忠義

鄉民陳之琬少有胆力忠義自負嘉慶教匪之變設卡宋家聖募有力者充鄉勇琬應募賊乘晨霧迷漫繞出卡後殲勇殆盡琬猶殺數賊而亡無子以兄子世綜嗣後議叙鄉飲仲賓嗣孫炳奎邑庠

張開序士橋人少有勇力咸豐四年夏粵匪突至其兄達序爲賊擄開不屈遂櫻賊鋒死鄉黨義之

盧秉義住漳河濱家素饒父周早卒兄粹忠厚樸誠兄英恂恂儒者惟義年最少豪健饒膽略嘉慶之亂教匪至腰店觀一鄉惶惑無主義奮然曰賊故農夫爲無賴子所誘耳苟合謀齊力可聚而殲也奚懼焉僉乃踴躍壯其議義率衆渡河一鼓而潰殺賊二千七百餘義抵家嘔血數斗卒時年二十一鄉里至今惜之

當陽縣補續志

卷二

人物

忠義

十一

宜昌印書館承印

篤行

邑庠生王映蘭號香畹性端方少孤事母姜安人能養志成豐十年中丞胡給額以嘉其孝越三年登孝廉方正科邑中有公事有司恆倚以爲重而清操凜然無毫髮私居鄉正已率物有訂族譜連支祠立義田諸善舉一鄉觀感數十年無訟事焉沒年八十有三子步香孫鳳鳴俱庠生

湯之科字登雲性渾厚好善樂施道光辛丑年邑荒歉出穀二百餘石以全活鄉人子銳材孫鵬翎均庠生成謂厚德之報也卒年七十二

吳山高字行之爲人純樸持身尤謹嚴產不逾中貲而慷慨好施一族待以舉火者數十家橫暴相加悉含忍不與之較沒年七十孫元培邑廩生

曹雲衢號芹圃邑明經忠厚純謹兄邦佐早卒衢撫其兄之子若孫如已出俱教之成名家無擔石儲而安貧樂道怡然自足爲文一本先正從之遊者多知名士年逾七十而沒

曹金鑑號寶臣由廩生保舉訓導事父母以孝聞兄弟之間藹藹如也有司欽其品望公事恆倚以爲重子家寶國學孫東明邑庠道南廩生

盧先訓字紹道生平好施嘗備棺木製寒衣造河船善舉甚衆方山麓有起鳳橋爲往來通衢遭圯捐金倡首行人便之舉鄉飲介賓子永珩國子監典籍

羅聚華號協亭翰林院待詔銜性孝友事繼母陳能得其歡每盛怒之下華至卽霽顏兩兄早世撫諸姪如己出治家嚴明遇事能斷尤好施與歲饑糴米鄰省濟貧減本售之弗恤其善行多類此卒年七十三子忠信由歲貢登光緒元年制科忠盡忠正俱貢生忠耀廩生孫希藻廩生希彥希倫良璋俱庠生

傅朝育少失怙時運匪入境擄去數年始歸家貧甚以辛苦起家積而能散嘗捐錢五十作本每年收息以助里人徭役里人感戴立碑誌之後迭遇凶歲施穀百餘石以賑至若培荒塚修道路善舉尤多享年七十四孫凌雲邑廩生人品端嚴舉有八子人以爲積善之報

楊國學字肆山號念農人品高潔好讀書不求仕進善寫竹蘭人以酒遺之必應工吟咏詩草甚多無力付梓家極貧不妄受一錢卒年七十八

賀繩號木臣與弟絨俱邑明經性肫摯事母能孝與弟絨互相切劘和而不同平居無一慢容戲語待人推誠相與雖橫逆不與之較也耄猶好學爲文悉秉先正從遊甚衆服其教者無不以禮法自繩焉

傅天龍字秉陽山捐貢加理問銜少失怙事母以孝聞視膳問寢動遵禮制母享年八十卒後屢薦齋醮以資冥福雖年近七旬拜跪總不假之他人性樂善貸不責償親族待以舉火者數十家若因貧廢讀必假膏火束修之資以成全之至於施棺木設義渡種種善舉尤多艱于嗣

當陽縣補續志

卷一 人物 篤行

十三

宜昌印書館承印

息晚年連舉三子人以爲積善之所致云

羅廷斌號緯臣邑庠生家距縣百餘里俗獷悍不事詩書斌振鐸其間從遊日衆俗遂革至今絃誦不絕卒年七十二弟廷玉邑庠生少從林竹虛太史遊深見期許性恬淡不染塵氛閉戶謝客者五十餘載精易理事多前知常總戎詣門請卜目爲水鏡卒年八十斌子驥鳴孫忠信俱列制科孫毓衡癸酉選拔曾孫遊庠食餼者尤衆

王敬修字慎齋歲貢生善持家政家百餘口五世同堂數十年無間言署嘉魚訓導官聲遠著年八十八終長子金銛附貢次丙壽號小川丙午舉人揀選知縣心氣和平謙光可挹居家守乃父風歷任蒲圻嘉魚教諭卒年六十八孫士澗邑庠

楊經煇邑庠生廩生赤玉之子品行端楷取與嚴明中年父故母年九十餘躬親奉養未嘗一日離左右前憲任 聞其賢舉孝廉方正科辭不受後以孝義可風額其庭享年八十六無疾而終子司鐸庠生早殂

姚錦江字春浦邑明經品行端方學養深純與人接善氣充溢令人矜躁俱平至立教以根本爲先不尙浮靡故遊其門者皆成名士性尤清淡閉戶課讀非公事不輕履城市士林皆推重之壬戌歲以軍功議叙加國子監學正銜著有樹人堂文集壽八十一
耆民沈正已號敬安舉止端方言動以禮里中有爭端見之輒肅然起敬事親尤純篤父憲嘗

以書緣未結誠已已識之不致忘後憲卒以家事冗廢學而終以此爲憾嘗建塾延師朝夕飲膳必親視塾有乏修金者恆代出不冀其償生子三長玉林廩貢次少林三瑞林孫華芹曾孫鴻儀俱庠生

鄭管號東海邑庠生性端嚴浮狂者見之衣冠頓肅設教洋子山唱和皆一時名流從遊者半列膠庠著有課餘詩草待梓

馮天鑑少業儒州縣試屢列前茅學憲朱考取佾生後棄儒業農品行端方現年八十八

范紀勳號垂可邑廩生事母以孝聞性廉介教讀外不妄受一金薰其德者多化爲善良焉

鄭思豐議敘修職郎孝友傳家好善樂施五公橋置田一頃以爲義地卒年八十八孫以芬附貢生

佟映漳號月川邑庠生性純謹舉止端方言笑不苟爲文一本先正其教授生徒以小學孝經爲宗游其門者多知禮法卒年四十五

邑庠湯銳材之科子也正直端方訓子姪有法非公不入城市前令任公道鎔以公正額榮之卒年七十有一

熊叶兆號礪卿邑恩貢性廉靜敦品勵學不染塵氛教讀外無他圖焉卒年五十四
監生金相鈍字煥然性孝友其父八十餘躬親扶持毫不諉諸僮僕弟相鑑齒繁受累鈍以已

當陽縣續補志

卷二

人物 賢行

十四

宜昌印書館承印

所餘者與之親戚借貸概不責償鄉里德之子二教督甚嚴長嘉會試用縣丞次玉麟廩貢就職訓導

儒士曹魁邦字占元敦孝友性復寬厚強悍者不與之較族黨悉賴維持年五十七卒子家岸恪守家風孫樹聲庠生公正廉潔邑中公事多倚重焉

馮步瀛號淡齋邑增生敦孝友家貧而介取與不苟宗族悉賴維持邑中要公尤倚重之屢攷優等未獲食餼士林惜之享年七十有三

林時豐漳河農人性和而介不屑較錙銖與人無忤義不可者輒形諸辭色家中落習種牛痘不索謝沙商爲避亂計向豐購產易邀重貲豐弗較按常價售之子孫純謹世守其家風

邑庠朱子醕號訥臣天性孝友父病痢雖極危必躬親之歷久不懈父沒哀毀骨立盡哀盡禮母馬氏無疾而終常以未侍湯藥爲恨姪若孫教訓若己出無分畛域享年七十有八子茂南邑廩生

曹邦援號達菴邑監生少小失怙事母孝事必稟命佃戶有欠租母戒以毋索置弗問有兄二次兄性拘援委曲求全終身無間言性尤直遇事能斷族黨有事輒支一言決之罔弗聽其敬服如此長子華國貢生次子家珍監生

朱永延行三性渾厚多義行其父士元家中落有子五人惟長子定親延以傭工積資先爲諸昆季娶訖並贖田分給家人賴以裕後乃自娶得一子名昌明沒年七十六

仲賓舒玉書字金簡邑庠開華子也華性剛毅善守貧書委曲承顏能得其歡心持已儉待人忠尤篤於倫義中年妻故誓不續仰事俯蓄維艱子樹德有乃父風現年八十五

文苑

劉德華拔貢生饒才學工心計萬城堤係荊州城保障華家於其旁荊邑官民恆倚賴之子有爵丁卯科舉人文名噴甚中年殞謝士林惜之孫匯成庠生

賀緘號默亭性穎異未弱冠補諸生科歲試輒列優等文筆傲岸詩古尤不落恆蹊邑中知名士多從之遊屢薦不售以明經老士林惜之

羅忠厚號崇菴邑廩生性孝友事繼母能得其歡課子弟甚勤成名者十有三人歲科試屢冠軍張孝達學憲尤奇其才賞賚甚厚著有訓蒙草爭傳誦之

嚴正憲字乃慎邑廩生能文章負性孝友親疾子弟雖多必親侍湯藥善教誘受業者多知名士子大箴孫有煦俱明經弟正敍姪大訓俱庠生

恩貢林栖鶴號立亭候選直隸州州判性質樸克敦孝友父嚴毅能曲得其歡兄早世撫姪如已出其文清真雅正一以簡鍊爲宗士無遠近咸則之著有萃生堂文集行世卒年七有六

朱守閩號小松邑廩生性清潔工吟詠不求進取所交皆一時名士著有帶兩山房詩集待梓年三十餘而卒士林惜之

高士純號實甫邑恩貢性揮霍能文章主迴峯書院講席十餘年成名者衆享年七十有八弟士楷歲貢子志伊志偉俱邑庠

當陽縣補續志

卷二

人物 文苑

十五

宜昌印書館承印

恩貢吳沛榮家貧力學長於教授從遊甚衆入泮食餼者不下數十人鄉閭屢膺薦未獲一第暮年壯志猶存卒年八十有五子丙堃邑庠生

恩貢江榮柵號實卿溫文爾雅從無急言遽色與其兄蔚柵均以書法鳴兄早逝榮柵卒年七十有二

朱守濂號小溪邑廩生詩古文藝屢見賞於宗工而戰銷闡輒北授徒精講貫詩古悉綜漢魏文以先正爲歸故門下多知名士卒年四十四士林惜之

壽考

徐鼎賢居心忠厚持身儉樸事親竭力盡志雖菽水亦能承歡積數十年如一日子三俱能以孝友世其家孫向陽邑庠生卒年八十四

楊士祥性沉靜少事詩書有志未逮遂以處士終接物平恕有犯者處之坦然現年九十二胡珍 文定公之後裔居心忠厚治家儉樸子孫衆多教之皆有義方卒年九十孫映南庠生張道進性端方勤於農事子孫蕃衍卒年百有一歲其兄道成卒年九十有四其弟道志現年九十一門壽攷稱人瑞焉孫鳳寅廩生文煥庠生志孫啓漢庠生

李以俊字輔軒邑仲賓業儒少失怙恃昆季五最女愛至老雍睦無間言居平不妄論人得失里黨有爭訟折以片言莫不悅服年八十猶能挑燈作蠅頭楷書且精堪輿卒年八十九孫芳邑庠

彭可行號敦善昆季六人終身無間言而公尤善氣迎人恂恂有長者風卒年八十二其長兄可道號環溪爲邑諸生卒年八十六餘皆八十七十餘而終一門壽考誠邑中所罕有也姪文燦孫德元均列庠生

貢生舒樹德字滋圃鄉賓金簡之子也性樸誠雖起家貨殖而悃悃無市塵氣幼失恃事父以孝聞親黨有貧者咸周恤之子孫繁昌五世同堂卒年八十五

當陽縣補續志

卷二

人物 壽考

十六

宜昌印書館承印

周維棟字良材性廉正嘉慶年教匪入境鄉勇隨官軍剿賊棟與有力焉卒年八十八子汝淮廉正有乃父風一介不取積學三十年未遇棄儒業農怡然自足卒年九十二孫純士現年七十有二

張啓暄字旭亨積學三十餘未遇乃開館授徒出其門者入庠食餼亦間有人生平多善舉重然諾元配徐氏勤儉溫良以爲內助教子孫以耕讀世其家現年九十夫婦均康強見元孫焉楊達寬號小泉幼見知於王讓生邑侯屢拔前茅不售授徒悉本先正出其門者多知名士晚年愛詩酒不履城市者三十年卒年八十有九邑庠楊炳奎其猶子也學其學早售現年六十四

千總銜杜德芳性誠篤好施與親族有困乏者周恤之從無吝容無德色現年八十有八羅傳惠邑人性渾樸善課農桑克勤儉足不履城市者數十年時年八十八子家暄有乃父風多義行現年六十三

明

黃輝字平倩四川南充人萬歷十七年進士官編修中年妻故不復娶尋以少詹事乞歸遨遊山水寓邑之玉泉柴紫菴與袁中郎昆季結詩酒社題詠甚富
國朝

袁瓚號廉叔江蘇奉賢人登辛酉拔萃科朝考畢學憲清聘掌文衡來楚旋經粵匪亂留鵠垣邑侯任道鎔聘作教讀至當接經邑侯阮恩光聘主迴峯書院講席凡志書文衡尺牘諸筆墨事均任之取士重純樸論文悉本先正及門有以時藝請者屏棄之弗令讀也故從遊多知名士暇日課雜著把酒談詩登高作賦雖時興故國之思渾如也善書法尤工八分待人如行雲流水活潑潑地其詩賦書之風流怡蕩咸如之梓白燕巢賦草行世寓當甫五年藩司何璟其受知師也敦逼到省歸候補縣入巡撫曾公墓教讀主奏草名益嘖甚丙子攝篆黃梅有慈惠聲年餘補授來鳳蒞任方二載卒於官子萊奉殯歸故里

當陽縣補續志

卷二

人物

流寓

十七

宜昌印書館承印

釋

明常鎮字玉菴風儀挺秀士人咸推重之隸邑之玉泉寺三十五年名播朝野世以鐘山目之每講涅槃等經聽從者衆萬歷九年逝

慧林號祇園邑人依玉菴出家凡爲虛已從人人恆從之主玉泉法席時重刻隋唐宋元常任田界於石晚年無疾而逝


了凡本邑靳氏子總角時依報恩寺廣通祝髮研精內典策杖南遊遇僧無跡與語言下見諦得續北宗正派著有楞嚴講錄傳世

清祖裕號鼻源白衣莊人十歲出家玉泉師事僧惟心開東禪堂爲十方叢林以接衆道行孤高不與人爭卒年五十七

能安玉泉僧也性古樸從不受人知亦不屑有號中年受具朝山歸司大佛殿香煙及鐘鼓十餘年所稍有蓄積卽以之助修佛殿六十餘一日如廁後淨手口念阿彌陀立而逝



CU260155
394
12



當陽縣補續志
第二冊

當陽縣補續志卷三

列女志

節婦

儒童張啓元之妻曹氏年十四于歸十五夫故無子以弟啓春之長子嗣氏容止莊嚴以孝事翁姑接其範者莫不肅然起敬教子尤嚴每篝燈課讀夜半乃休邑侯任給以輝筆清河匾額歿年五十嗣子厚存邑廩生

儒童潘文苑之妻吳氏生子女各一二十四夫故氏一慟幾絕其不以身殉者欲撫孤以延夫祀也家赤貧不受人憐惟饋自母家者弗却居恆毀妝斂迹與母家同里未嘗輕歸歸亦卽返晚年兒女婚嫁親朋團集非至戚不出與語故生平鄉人罕識其面卒年六十有二

曹高鴻之妻陳氏遠邑鄉飲賓陳登梯之女也年二十四夫卒氏堅貞自守事後姑以孝聞後姑遇之嚴氏曲意順承不稍懈子翊清方成童氏延師課讀隆其館穀後列邑庠現年六十

儒童李國本之妻楊氏年二十五本以童子軍屢拔前茅不售遂嘔血卒子甫二齡氏奉姑撫子孝慈兼盡現年六十三歲

施興章之妻熊氏年二十一而章逝遺一子家瘠薄翁姑衰老氏勤於紡織視章存時有加章有叔祖父母寄居鄰縣自俱替其孫尙孩提氏倩人迎歸奉養與翁姑均且以勤儉率子弟以

當陽縣補續志

卷三

列女志 旌表婦節

宜昌印書館承印

致家資漸裕現年六十九歲

阮繼世之妻劉氏年二十三而夫故家赤貧子甫三歲清操自矢翁姑欲強嫁之多方逼迫氏不得已轉居母家焉母家亦貧氏以十指度日甚至乞食於外拮据備至現年七十有六

彭可章之妻熊氏年二十六而夫故無子翁姑亦相繼亡以族人子嗣焉嘉慶時土匪過境氏毀形匿跡以免道光咸豐年間饑饉頻仍氏携子遷徙累至絕食迄今子孫成立家亦小康卒年八十有四

黃玉柱之妻張氏年二十四而寡遺子淮清甫二齡姑熊氏早寡氏事姑撫子零丁孤苦守節四十六年

童陳氏童寅元之母也年二十六夫故遺一子家赤貧有勸其鬻子而他適者氏不聽每日抱子行乞子漸長卒成家道諸孫林立卒年七十有六

馮杜氏儒生馮宗貴之妻年二十五貴逝父母相繼亡子二氏課以耕讀完配後諸孫繼起孫又生孫眼觀五代猶抱保提攜無衰憊狀是節母中之壽母也卒年九十有八

童張氏邑庠童煥文之母年二十四夫故翁姑俱逝祖姑老而病氏日侍湯藥衣不解帶者數年歿後哀戚殊甚時文甫數歲擇師教讀年二十人庠皆氏訓誨所致也守節五十一年卒

鄧仁廣之繼妻金氏十六歸鄧二十四夫故撫夫前妻之子讀未售納成均既婚而亡與孀媳



田氏共勵貞堅田氏遺腹子義方邑庠氏現年七十有一

趙經世之妻萬氏邑庠萬文瓚之次女二十八歲夫故遺一子撫育成立既婚而逝祀幾絕其媳陶氏邑孝廉陶膺唐女也姑媳相依冰霜共勵立堂孫繼桂爲嗣孫氏現年六十

鄭一枝之繼妻周氏年十六歸枝十九夫故遺一子甫數月枝前妻汪氏遺有二女氏視如已出竭力撫養鄉里稱賢德焉現年五十一

儒士張立身之妻張氏年十九歸身三載夫歿遺一女僅數月氏慟絕復甦勉稱未亡人孝事二親立弟之子順道爲嗣以養以教至於成立閭里稱之現年六十有三

宦裔徐景升之妻羅氏升初有廢疾氏方垂髫卽歸徐侍姑合卺二載產一男而寡氏曲盡婦道不以貧窶易心無何遺孤殤姑亦病歿氏復撫姪以奉夫祀沒年六十

李永魁之妻李氏年二十五而寡家貧甚氏養舅姑二十餘年恆以紡織佐饗殮生二子次子早妖長子完配未久亦相繼歿所遺孫男女各一氏撫之備歷艱辛而李氏之緒得以不墜

庠生胡維禮之妻楊氏十四歸胡越四載而寡遺孤甫三齡非白親操手辦吉凶事十餘次邑侯王以松堅柏翠表其門卒年七十有二

阮繼炳之妻王氏年二十舉一子而夫故子旋殤相依爲命者惟堂上一姑耳姑之女適人貧甚氏周恤不稍吝族姪欽其賢爭願爲之後因按房而立三子焉現年五十九歲

當陽縣補續志

卷二

列女志 旌表婦節

二

宜昌印書館承印

文章張繼遠之妻李氏年二十三而夫故當遠病篤時慮其青年難守不欲以節強之氏指天日誓志後遠沒氏貧苦堅守事翁姑以孝撫子以慈卒年五十有四

徐文燦之妻彭氏年十九歸燦二十四夫亡逾月生一子氏奉姑育子身勤紡織迨子六歲姑又亡氏屢遭橫逆不變其操卒年四十七

儒童鄭永美之妻任氏于歸十月美死無出氏矢志柏舟立族姪爲嗣僅三歲撫之成人娶媳趙氏僅一載而趙旋歿續娶媳王氏未幾嗣子亦殤更爲王氏立嗣娶孫媳莊氏不幸嗣孫又

故莊氏旋自經王氏亦憂鬱成疾卒乃復立嗣孫以延其祀慘淡經營艱苦備嘗未有如任氏者賢學使者杜以清節揚芬額其門現年八十七

張光福之妻賀氏年十七于歸僅三月夫故無子逾十年其夫弟生子乃立爲後撫養完配嗣子又亡傳遺一孫孀媳趙氏亦歿氏撫孫守節如故有司給以苦節完貞匾額年逾七十而終

朱本福之妻楊氏十九適朱事孀姑以孝聞二十二夫故遺一子甫七月氏零丁孤苦撫之成立子旋歿孫三歲又以未亡人撫此藐諸孤臥薪嘗胆難以言罄現年六十

楊學書之妻鍾氏年二十二歸書生二子一女書充施南副標兵隨大軍征金川陣亡氏年二十七家赤貧以縫紉自給後次子正鳳以軍功授遠安把總遂家焉年七十猶日事紡績生平

端重寡言卒年八十以子正鳳官 勅授孀人

朱均任之妻熊氏年二十一夫故無子立二房子光遠爲嗣精理內外家道寢裕同房澁之共圖侵蝕氏不堪飲恨而終年五十八

以上二十六名業經彙詳題奉

旌表

周經國之妻劉氏邑監生三剛姊也于歸四年國故遺腹子光楚家赤貧族固多橫暴屢相凌逼皆賴剛力以寧及楚娶郭媳氏課耕織敦勤儉以故家漸裕晚年楚又歿氏與郭媳含泣撫孫曾卒年八十有六

熊天成之妻袁氏守節三十三年現年五十六

莊作善之妻任氏守節三十七年現年五十六

謝宗直之妻王氏年二十九夫故氏盡瘁操作孝慈兼盡子監生桂林克遵懿訓家漸裕道光十八年學憲方題以砥節懷清匾額守節四十三年亡年七十二

文童盧永槐之妻曹氏年二十五歲夫故苦節自勵姑染有痼疾氏侍奉屢年不倦現年五十有一

盧繼燿之妻佟氏年二十五而夫故事翁姑能養志翁得暈眩疾扶持二十餘年不倦立姪以爲後者二耕讀並課綿先祀也現年五十有二

當陽縣補續志

卷二

列女志 婦節

二二

宜昌印書館承印

任士彬之妻汪氏年十八歲適任二年舉一子而夫亡氏矢志堅貞家極貧日事紡績以養翁姑雖菜羹必先奉之年近八旬猶日事女工不休

鄭光樹之妻郭氏年十八歸鄭二十四夫故遺有二子氏日夜紡績奉姑惟謹教子有方夫弟僅數歲亦撫養成立卒年五十七

張文彬之妻唐氏年十八彬故子係遺腹氏仰事孀姑俯育嬰兒孝慈兼盡現年六十

鄭一桂之妻姜氏年十六適鄭二十四夫故遺子女各一氏閨門嚴肅言笑不苟苦志自勵現年六十

周太慶之妻陳氏年十八適周二十四夫故氏霜操不移撫子傳厚教育成立卒年六十一

朱均庠之妻陳氏年二十二而庠故無子立房姪以爲夫後復有一姪流離在外氏招而養之且爲歷代祖墓建石碣焉現年八十有五

施興孝之妻周氏年二十六而夫故遺二子時翁歿姑病瘵殮難給氏惟恃紡織以逮養有族豪伺其貧懦頻施侵凌氏遷徙他鄉乃得免現年五十九歲

儒士馮興文之妻劉氏年二十歸文二十四文歿氏痛哭幾不欲生以翁老無所養強起治喪事冰操凜然奉翁撫子備嘗辛苦卒年六十三

朱其轉之妻盧氏年二十七夫故遺二女不數年俱殤事翁姑極孝姑病屢年氏侍奉不難床

禔現年五十有二

楊運福之妻齊氏守節三十一年現年五十八

胡之賢之妻曹氏年二十四夫故遺一子僅九月氏矢志撫孤樵採灌園艱苦備嘗晚年家不戒於火前後屋俱燬惟氏臥宅無恙卒年九十有二元孫春榮候選縣丞榮之祖母羅氏暨母羅氏俱親見六代五世同堂

李清和之妻萬氏邑庠萬文瓚之長女五載夫亡遺一子氏仰事俯蓄備嘗辛苦現年六十有二

儒士熊運茂之妻陳氏十六于歸二十八而夫故辛苦持家教子寓慈於嚴家道因之寢昌現年六十

張肇雄之妻陳氏年二十二而夫故家赤貧事姑撫子傭工度日子旋殤守貞不移卒年七十賀胡氏武舉賀國枏之媳年二十七夫故姑陳氏性極嚴軋形詬諄氏委曲承順從無愠色僅一子早歿氏立嗣孫教之讀頗有家法現年七十一

周光法之妻劉氏十六歸周二十四夫故有孀姑老而善病氏事之極謹及子成立完娶姑之飲食起居氏猶親侍之不假人手現年五十九

楊文成之妻黃氏十七歸楊二十九夫故氏仰事俯蓄獨理家政未幾長子歿遺一孫甫周歲

當陽縣補續志

卷二

列女志 節婦

四

宜昌印書館承印

氏又含淚撫孫老而不懈現有六十有五

胡源清之妻陳氏守節四十三年現年六十四

鄭永美之妻任氏年十九于歸十月而夫故守節四十年現年六十

鄭文華之妻周氏守節三十五年現年六十一

張瑞之妻趙氏嘉慶元年瑞遇賊受害氏矢志守節事姑以孝稱卒年六十三

劉仁安之妻曹氏年十九適劉二十五夫故苦節自守撫子光鑒讀書列庠縣主周給以節勵

冰霜匾額現年六十八

張自豐之母林氏二十六歲夫故氏誓志撫孤克儉克勤晚年境遇稍順子孫繁衍五世同堂林時慶之妻陳氏二十二歲夫故氏事後姑極謹飲食衣服必躬親無子立胞姪爲嗣寓慈于嚴教之成立現年六十二

張志慎之妻嚴氏二十九歲夫故家赤貧遺一子撫之成立現年六十九

張文謹之妻姚氏荆邑廩貢授山東臨淄縣令姚公相帝之耳孫也年十九于歸踰年夫亡無出以姪自盈嗣矢志守節嘔笑不苟早晚奉姑命維謹每天雨浹旬戶外無一足跡親舊非有故不往所往之坐處必拂拭至潔而後坐焉卒年八十學憲王給有清節揚輝匾額

齊成孝之妻趙氏年二十五而寡氏矢志靡他長子開裕次子開初入邑庠早逝媳劉氏亦清

操自守現年六十三

靳元珮之妻張氏年十六于歸嘉慶初年流賊入境珮被虜未知所終張誓志守節以事翁姑自任時年二十三也遺一子林健撫之成立業儒未遇孫楚珮曾孫師文俱邑庠歿年六十四以無疾終

監生黃元音之妻席氏年二十九夫歿氏上事下蓄一貞自守現年八十有七胡中丞給以竹筠松操匾額

嚴永崇之妻劉氏年二十七夫歿遺二子甫離襁褓家又赤貧氏事上撫下辛苦備嘗姑病三載左右承順不倦現年五十三

馮世麟之妻段氏年二十八夫故家貧無子翁又失明氏怨尤不形撫姪以綿其祀里黨咸欽恤焉現年六十有二

彭應秀之妻常氏年二十八夫亡家貧翁老子幼氏上事下育以一身獨任之現年六十四汪大純之妻胡氏年二十三夫故遺孤甫三歲氏撫之成立事姑熊氏曲盡其孝姑亦少寡勵節享年八十餘歲已列前誌胡卒年五十六縣學給以節觀前徽匾額

汪文雄之嗣母傅氏年二十四夫故無子以姪文雄承祀現年七十九縣學以苦節可貞額其門

當陽縣補續志

卷二

列女志 節婦

五

宜昌印書館承印

熊運位之妻傅氏年二十二夫故子監生子兆婚後即沒無嗣氏以姪興培承祀與媳共勵守節現年六十五

汪大千之妻孫氏年二十四夫故無出翁姑憐其少欲嫁之氏矢志不移以姪學潛嗣現年七十二

傅天相之妻鄧氏年十九夫故無子族人俱嫌其貧不願爲嗣氏泣請族衆訴以大義族衆強以疏姪子焉享年七十六

汪廷期之妻曹氏年二十五夫故無子以姪爲嗣年未三十而歿媳謝氏亦以節自矢姑媳相依爲命曹年七十五謝現年五十六

陳昌盛之妻汪氏年二十四夫故子甫五歲地無立錐氏苦節自貞現年八十有七張國順之妻文氏年二十夫故遺一子苦節自勵姑早逝翁娶後姑年穉于氏事之尤謹年逾八十無疾而終

詹士舉之妻高氏年二十一夫亡貧甚傭工自給途遇熟人並不仰視卒年七十有七

張開勳之妻李氏年十九夫亡腹遺一子母早逝父惜其年青家貧謀于氏翁姑欲奪其志氏力拒之距父家咫尺氏不輕歸省或經日不炊自若也壽終六旬

周宗光之妻張氏年二十三夫亡無出氏欲以身殉勺飲不入口翁姑曰吾子死爾卽子也何

忍再貽吾憂爲立嗣奉祀氏事翁姑極孝翁失明有事呼子氏卽至飲食扶持事事躬親現年六十縣學給以節孝流芳匾額

盛萬椿之妻胡氏年二十四而寡家貧長子夭折遺腹生子必祥堅貞自守鬻針線以撫孤現年六十二

儒童嚴有濟之妻陳氏年二十九夫故家計維艱勤于紡績矢志彌堅現年六十八

嚴正訂之妻游氏年二十七夫故家貧無子以姪孫嗣卒年七十三

馮天寶之妻嚴氏年十九而夫故遺一子甫歲餘氏清貧苦守現年六十三

嚴向涵之妻鍾氏年十八于歸甫一載夫故月餘生一子氏撫之三十歲旋夭氏又撫孫成立現年六十四

席全貞之母葉氏年十九而夫故氏堅貞自守現年六十七

盧秉璧之妻朱氏年二十一夫故無子家極貧氏上事孀姑下撫姪承祀紡織自給晚年家漸裕卒年七十其姑享年九十有四

李世遠之妻趙氏年十九夫故無子家貧俱不願爲嗣氏紡績自給依姪以終不身卒年七十

汪廷俊之妻談氏年二十八而寡遺有二子一女上事下育矢志堅貞卒年六十有五

當陽縣補續志

卷二

列女志 節婦

六

宜昌印書館承印

邑庠生王金鎔之母汪氏年二十六夫故鎔甫四齡姑目又瞽氏事姑撫子與孀嫂劉氏同勵冰操現年五十八

趙能佐之妻徐氏前任山西岳陽縣文翰之女也年十八粵匪入境舉家倉皇其父文郁送女至趙家卽時完婚月餘夫故無子氏誓志孤守並不歸省以姪承祀現年五十六

趙世化之妻胡氏年二十一夫故遺一子祖翁及翁姑俱在堂事上撫下紡績自給現年六十五

鄭宗智之妻張氏年二十四夫故無子撫姪嗣楷爲嗣慈愛不啻所生現年五十六

鄭永廣之妻莊氏二十四而寡氏勵志自守艱苦備嘗現今六十二歲子純先克自成立以孝謹聞于鄉

職員胡運庚之妻雷氏年二十四夫故無子氏誓志冰霜以姪開選承祀又有姪開培少失怙氏撫養無異已出延師課讀嚴慈兼盡現年七十有一

李賢樂之妻宋氏年二十夫故無子翁姑俱年近八旬氏竭力奉養誓志不移撫姪承祀現年五十六

汪炳蘭之妻鄧氏年二十五夫故遺孤二甫離襁褓氏清節凜然夫兄欲強嫁之氏以死自誓投繯氣將絕幸鄰婦解救免家貧力于農桑卒年七十八長媳羅氏性極孝事姑曲盡其歡享

年九十二迄今子孫繁衍人以爲節孝所致云

林時達之妻羅氏邑庠羅堃之女也性凝重年二十一而寡家計日艱守貞不渝事姑撫子備極慈孝自夫歿後茹素食淡終始如一現年六十三

姜正耀之妻張氏年二十六夫故時翁姑俱年邁氏誓志守節克盡孝道卒年六十六子大望監生孫建柵庠生

劉應溥之妻余氏年十七而寡遺腹生子崇岱苦節完貞現年八十有五

儒士徐文姓之妻劉氏邑庠劉師梅之姊也年十九于歸再期而喪所天遺腹子旋歿氏自矢靡他年逾七十始終如一

李慕登之妻白氏年十九而寡遺腹生一子撫育受室未幾子婦相繼亡僅遺一女家赤貧氏撫之備嘗辛苦同堂媪母染蠱疾氏口吮之無難色里黨稱孝婦焉卒年六十一

楊大定之妻郭氏把總楊正鳳之媳翁盲於目曲盡孝道年二十六而寡僅遺二女翁姑俱年八十氏竭力奉養宗族無承祧者氏依贅壻以自活現年六十一歲

楊祖善之妻傅氏年十九而寡遺腹生一子瑞庭家貧朝不謀夕氏工針黹以養八旬姑屢加橫逆氏善避之里稱賢婦焉現年五十六

彭必堯之妻何氏年二十一夫故遺子應志甫二齡媪姑已老僅瘠田數畝氏矢志堅貞以紡

當陽縣補續志

卷二

列女志 節婦

七

宜昌印書館承印

織佐其饗殮姑亡殯殮盡禮苦節三十一年

高應遠之妻王氏年二十三而寡僅遺一女立嗣承祀事翁姑以孝聞苦節三十五年

文童劉天會之妻慎氏年二十夫故無子立姪承祧守節三十二年

姚在選之妻魏氏年二十夫故遺腹子學量守節三十一年

文童傅志位之妻吳氏年十八于歸月餘夫故立姪爲嗣姑盧氏早寡氏仰事俯蓄艱苦備嘗

守節三十四年現年五十二

武生吳文蔚之妻傅氏年二十六而寡立姪爲嗣翁姑存歿養葬皆遵禮制現年六十八

廩生許廷梓之妻蘇氏年二十六夫故翁七旬垂涕幾喪明氏朝夕安慰子光焯甫三齡氏撫

之成立讀書能文未幾歿媳李氏庠生李天保之長女生子二姑媳相依爲命里黨稱苦節焉

卒年四十九

陳永孚之妻劉氏十六賦于歸越六年夫故生子德昌甫四齡氏矢志堅貞仰事俯蓄維謹現

年五十四

儒童趙聖烈之妻賀氏年二十五烈亡子有才甫三齡氏事翁姑維謹撫子成立躬親紡績家

亦小康焉現年五十七

李正心之妻趙氏年二十五心故氏事繼母維謹訓子啓縉以義方現年五十八

彭應秀之妻常氏性渾厚年二十八秀亡家赤貧翁老子幼氏振理家務不憚勞苦現年六十

四 鄧書澤之妻羅氏年二十七夫故未一月姑亡生二子氏事翁育子孝慈兼盡翁亡喪葬皆如禮子蕃炳蕃昌俱國學現年六十

吳聯碧之妻羅氏年二十于歸甫十日夫故家貧無子氏矢志堅貞現年五十

楊開凡之妻盧氏年十七適楊二十而寡事翁姑以孝聞食素禮佛始終不渝子萬谷萬豐均業儒現年五十

鄭以成之妻向氏成業儒未售賣志以沒時年二十四矢志守節撫養諸子姪成立孫輩繁昌五世同堂卒年八十五

李文德之妻張氏年二十四而寡其胞弟妻張氏以姊妹爲妯娌亦三十三而寡二人相依爲命矢志清白治家嚴肅德妻卒年九十元曾滿堂遠妻卒年六十子運忠監生

楊達春之妻程氏甫婚姑卽病氏殷勤備至未幾姑歿遺夫弟纔四齡春又繼亡遺孤兩歲時氏年二十一撫孤育弟安貧守節且突遭水災田宇盡沒氏矢志愈堅惟賴紡績以活迄今子弟成立兩房禮祀氏一身延之卒年七十

劉希道之妻蕭氏守節二十八年現年五十有四

當陽縣補續志 卷二 列女志 節婦

八

宜昌印書館承印

王承瑚之妻馮氏道光六年于歸越三年瑚故遺子祖明甫二歲家極貧無尺寸土病姑羅氏臥床十年餘氏勤耕織奉湯藥無稍懈節守四十三年亡年六十二

李世錦之妻趙氏遠邑庠生趙善長胞姊也十八于歸踰兩歲夫卒家貧無子自食其力爨火屢虛年邁生理無計賴姪家富家貴分養之姪亦貧甚食極粗糲卒年七十三經親族資助始就葬焉

靳元伯之妻余氏年二十四伯故遺子三歲而瞽氏撫之成立翁早逝姑曹氏苦節多年氏事之以孝聞未幾瞽子又亡媳朱氏年甫二十四家貧燃香照績迨氏養姑壽終媳之事氏亦如之氏老多疾媳背負出入數十年無倦容里黨賢之氏現年八十媳五十有七三世苦節洵不多得云

金相周之妻王氏年十八于歸越四載周故嗣疎房姪承祧事上蓄下族黨無間言守節四十有七卒學憲王 給以石貞山壽匾額

費可柄之妻毛氏年二十一柄故矢志撫孤家甚微燃薪照績勤苦成家晚漸裕氏年七十一而終孫煥章邑庠

郭大耀之妻陳氏年二十九夫故撫遺腹子文林勤勞備至事翁姑以孝聞晚年家漸裕子納粟入監現年七十有四

傅貴望之妻鄧氏年二十四夫故無子矢志冰霜立嗣承祀事翁姑以孝聞守節五十餘載孫曾環列四世同堂現年七十有八

職員鄭可慶之妻熊氏年二十一歲夫故遺一子宗炎甫六月氏矢志撫孤力行勤儉以清夙債俾家漸裕督子負笈從師毫不姑息現年五十有一

曹家樹之妻張氏年二十五歲生子數月夫即逝勵志冰霜撫子以至成立現年五十六

儒童曹家憲之妻李氏年二十七夫故僅遺一子氏矢志柏舟志上事翁姑下撫孤兒辛苦備嘗現年六十二

陳蘭之妻姜氏監生陳汝治之母也性貞素知大義年二十八生子治七月而夫故事翁姑維謹病奉湯藥歿營喪葬必以禮尤好施與族黨之貧乏者咸賴以濟子孫列膠庠者三列職者五僉謂氏德惠所致云卒年七十三

談慎修之妻劉氏性剛烈年二十九夫故氏堅志節守言行不出閫雖骨肉至戚未嘗親授受事姑至孝姑患痰以手承者數月姑病篤轉以口承之無難色卒年八十九孫茂林邑庠生

虞天雱之妻孫氏年二十餘生子數月而夫故氏矢志撫孤言動必慎勤紡績以供衣食數十年無異事姑劉氏以孝聞姑病氏親侍湯藥歷久不懈現年五十六

劉天仕之妻張氏年十九于歸越一年夫故氏堅貞自矢家寒衣食不濟日事備作夜勤紡績

當陽縣補續志

卷三

列女志 節婦

九

宜昌印書館承印

尤孝於事姑姑患鼻淵左右扶持不忍一刻離無子立長房之子朝貴爲嗣現年五十八

虞家訓之妻劉氏虞文煥之母也十九賦于歸越七載而夫亡青年矢志柏舟奉事翁姑維謹戊子歲邑採訪林榮等稟請到院 學憲喻以冰雪懷清四字表其行亡年七十有九

楊紹新之妻尙氏二十賦于歸能得堂上歡生一子越四年夫故氏堅貞自矢仰事俯蓄 學憲王曾以節孝可風匾榮之居如何子生二孫媳旋繼氏寡守未幾而兩孫婚配媳又寡均克

繼氏志三世清節萃於一門噫苦矣氏亡年八十三

彭坤禹之妻嚴氏道光四年歸禹歷六年夫歿青年矢志仰事翁姑甚謹立族姪以奉夫祀守節五十年歿

張家鎬之妻屈氏十八于歸越三年夫故氏毀妝斂跡母家居清溪從不輕往來卽歲時一往必速歸性至孝委曲以成姑歡初以夫胞兄子嗣完娶後子逝又以夫胞弟子嗣氏歿年五十歲

羅杜氏邑廩生杜選仁之姊也八歲而孤與仁遵奉母教維謹及歸羅值家中落夫壻典賣匿具殆盡氏無怨言甫有子而喪所天仰賴母家以哺子無何子復殤不得已返依母家病於床三期而逝卒年五十有九

葉德榮之妻張氏于歸三載而榮故生子以安甫八月家貧姑老氏日勤紡績以自持苦守六

十四年卒年八十有四

儒童楊紹武之妻鄧氏同知銜煥賓之母也二十三賦柏舟事姑孝教子以義方親族有貧乏者惠之而自奉必儉樸現年五十三以子貴 誥封恭人

馬士勳之妻岳氏生子一驥一學夫旋故家亦中落氏撫子備極艱辛乃爲驥娶杜媳爲學娶姚媳未幾二子相繼亡兩媳克繼姑志守益堅一門三節猶鐵中之錚錚者岳氏守節五十一年亡年八十有六

傅天申之妻王氏生平寡言笑喜怒不形年二十一夫故氏乃長齋繡佛仰事姑嫜維謹未幾姑逝嗣子亦歿氏偕媳苦守歿年四十八

盧秉義之妻殷氏嘉慶教匪之變義奮勇擊賊勞極嘔血死氏年二十一痛絕食幾不欲生以姑老子幼故乃強支持嘗誡其子曰汝父性急能爲一鄉扞患難而卒以隕其身處變則可處常不必效也汝曹勉之學憲朱以彤管揚徽表其門享年八十無疾而終

羅孫宏之妻鍾氏于歸甫半月而宏故氏茹苦含貞矢志柏舟維謹立夫胞弟子有全爲嗣以奉夫祀現年五十有五

當陽縣補續志

卷三

列女志

節婦

十

宜昌印書館承印

烈婦

王國材之妻范氏嘉慶三年教匪之亂合家逃至常家林爲賊所掠脅之以刃氏誓死不從賊殺其家至八口氏佯謂其夫曰爾非吾一家胡不去夫乃逃舉家十七口俱遇害後月餘夫殮其屍見氏猶凜然如生

謝良衛之妻胡氏夫歿年二十守節自誓父母欲奪而嫁之遂自縊

謝良美之妻曹氏年二十二夫卒無子以禮祀托之夫兄遂自溺焉

以上三名已詳

文童鄭宗康之妻李氏幼有志操于歸五年無子康以勤學成疾自計必死詢氏身後事氏誓以身殉未幾康卒家人懼氏踐其言多方勸慰之氏陽諾以安舅姑心迨防之少懈飲毒死鄉黨義之

孝婦

盧姚氏邑明經姚錦江之孫女庠生姚啓琳之姊也年二十七而夫歿氏痛甚又恐以哭傷翁姑心暗中輒飲泣焉夫歿之次年翁得暴疾延醫調治罔效氏呼天籲地祈以身代不靈迫極乃潛以刀剖腹割肝煎湯僞以他肉進翁飲之病霍然及見氏女有血痕逼問之乃得其實鄉

憐聞其異俱來覘見刀口未合而氏毫無痛楚苦想至誠之能感神焉耳
史必勤之長媳史雷氏八歲時其父母往江南墾田送至史家童養得翁姑歡心婚後孝敬無違及至三十六歲翁病痰疾危甚氏侍湯藥罔懈一日以肉湯進翁翁啜之怪其味有異囑姑察焉姑素聞氏有損身救翁語因解氏懷強視之見其刀口長三寸許以綫縫之血猶涔七下滴也駭極逼問得實乃知所進之肉湯係割肝雜豬肉以進即延醫療治氏頗不以爲苦起居如常族人庠生史光熾聞於學學師熊用駢語褒之人爭傳誦焉

馬大道之妻陶氏光緒三年因翁姑病臥日久醫藥罔效氏焚香禱祝割肉和羹以進二老病俱瘳

千總郭建三之妻文氏性純謹事上以孝聞翁病篤氏割肱以奉病旋愈中年夫故矢志堅貞現年五十有八

當陽縣補續志

卷三

列女志

孝婦

十一

宜昌印書館承印

貞女

梁怡圃之女梁姑字監生李盛元之子世蓋年十六歿亡女尙未嫁卽脫簪珥着衰絰以守節請於母母送之李門潔居一室非大故不至中堂家人罕見其面現年五十二以族姪家緒爲嗣

光緒十年詳 憲題奉

旌表

賢母

王德元之母任氏其夫先榮早逝德元中年亡家極貧氏率媳李氏勤儉治家訓孫雲錦雲章敦孝友興家道業商業儒或織或紡皆循循有法會九旬曾孫四元孫六五世同堂里黨咸稱之

馮清香之母黃氏年三十夫故子幼家赤貧廬先塋棲身餐菜根度日晝耘夜績備極艱辛里黨咸欽恤之年八十五而終子孫繁衍四世同堂

武生曹邦授之妻韓氏年三十授故遺一子尙幼撐持門戶辛苦備嘗事姑以孝聞教子嚴慈兼盡惠貧之繩已必以禮見者無不肅然敬一鄉稱女中君子焉年五十一而終

王相典之母張氏性端方言笑不苟夫故撫子成立家微甚氏勤紡織督耕耘稱小康焉五世同居無間言現年八十有八

監生韓明世之妻蘇氏夫故遺二子尙幼氏備歷艱辛始稱小康性慈恭好施與族黨待以舉火者衆享年七十有三子朝柄邑武庠朝登貢生孫國均監生

曹引湖之母陳氏生子三中年夫故家貧子幼次子元已出嗣長子湖三子漳又相繼而歿氏日勤紡績治田園以自濟其艱苦有不堪言者現年七十三

郭傳薪之妻劉氏邑庠廷輝母也薪以承祧故納貳室雷氏生二子氏卽順夫志攜輝鄉居又

當陽縣補續志

卷三

列女志 賢母

十一

宜昌印書館承印

恐輝學之不力也乃獨理家政課耕讀督輝習楷書嘗謂作字如作人務以端方正直爲本雷氏沒氏迎夫就養於鄉奉梁庶益篤撫雷氏小兒女如己出婚嫁時始聽其柝居先薪六月卒享年七十有三

齊一光之妻楊氏幼嫻內則非幃裳不見舅姑光積學三十餘年未售氏獨理家政仰事俯蓄維謹及光歿氏乃爲子孫立家規嚴慈兼濟卽今婦女輩無故不敢至中堂卒年九十有九

壽母

楊盛祥之妻王氏治家勤儉一生無病日事紡績至老不懈卒年九十有五子益壯七十二歲入庠孫榮槐茂槐俱邑庠

監生朱錦章之母國氏性溫惠勤以勵身紡績無間寒暑卒年九十三

曹徐氏儒童曹思六之妻候選訓導曹金鑑之母也六中道歿氏以耕讀課三子使成立性尤好施與鄉鄰中有困乏必周恤之佃戶有欠租者戒其子無索及卒諸窮民奔走呼號如傷考妣以故子與孫入膠庠而列成均者濟濟人皆謂氏窮德所致也年八十二無疾而終

以上三名已詳

庠生萬文瓚之妻羅氏克勤婦職相夫成名夫歿遺一子治純中年歿乏嗣母慨然捐田五石永作書院膏火以成夫培植後學之志邑人賢之立碑誌其事卒年八十九

邑庠王可貢之妻邵氏性端嚴貢早逝長子廷彥方數歲次子焜耀甫三月氏寓嚴於慈延師課子俱成名卒年八十一孫汝楨監生汝章廩生曾孫化南壽南鎮南俱庠生

李代忠之妻李氏年十八于歸逾數載忠淹斃生子甫四日氏矢志撫孤事上蓄下艱苦莫可名狀未幾子歿氏又撫孫潤梅成立壽終已近百歲

張家珍之母李氏性溫柔以勤儉治其家既老猶勤紡績子孫林立稱蕃衍焉現年九十二

當陽縣補續志

卷二

列女志 壽母

十三

宜昌印書館承印

監生嚴大開之母汪氏年九十餘精力弗衰女紅事尙可躬親孫承先邑武庠

楊文選之妻王氏晚年夫故乃督桑麻勤紡績治家有法現年八十六曾元繞膝五世一堂子金聲邑庠

吳世泰之妻董氏寶善之母也中年夫故氏勞鞠育躬親紡績現年九十又五成稱康強焉

廖前中之妻游氏光國之母也性和平從無急言遽色于歸後夫家固拮据乃克勤儉勸內助家道漸裕夫歿喪盡禮身其康強一堂五世現年九十有五

邑庠楊太然之妻鍾氏中年夫故矢志貞堅教子孫有義方躬親紡績至老不懈現年九十

孫繼太之妻艾氏幼嫻姆訓勞紡績中年夫故矢志貞堅教子孫以耕讀勤儉世其家現年八十有八子述孔邑國學

楊國楷之妻馮氏現年九十有初八楷業儒未售乃偕氏隱沮水濱陶情杯酒種花蒔竹以爲樂氏率兒媳輩濫操井臼勤耕織以爲衣食楷亡年八十七



當陽縣補續志卷四

藝文志

勅賜清溪禪寺重修碑記

明相李賢南陽人

荆南玉陽廣福山清溪禪寺者僧智念之所重建也寺創始於晉武帝太元丙戌年間遠公法師倡道茲山山之前水濼迴曰清溪清澈可愛師嘗於是掬水浴身時白蓮花開敷水面遐邇之人瞻奇歎異歷元寺燬於兵至國朝永樂乙未了意禪師居之修葺弗果正統二年春今僧錄善並南浦大師之弟子智念以訪求天下名山諸祖遺蹤至是乃喟然曰有心皆是佛無地不名坤遂卓錫焉時寺之檀越曹覺忠陳德義等請師振起之寺據廣福山之勝九峯諸山獻秀舒奇美樹嘉花葱菁藂鬱誠天造地設之淨境也而覺忠等不負靈山付囑之說力施以成其志用不足勸其鄉之豐家鉅族協力以贊助之自是智念偕其徒慧旻等矢以堅忍自居夷荆榛闢土壤市材鳩工首創大佛殿高四尋有奇深廣倍之殿後建法堂左右爲圓通地藏等殿其前則鐘鼓樓門廊方丈禪室庫廩靡不備焉記其經始訖於落成閱十寒暑實十一年丙寅秋也寶相玉毫輝映霄漢其宏偉盛大之規振古罕儷天順改元初皇帝復登寶位庶政一新雨露之恩均施溥被而其崇獎佛道之心其至矣乎智念得以疏於上獲賜令額仍詔禮部劄付焚修使天下人人知佛之所以爲教君子資之以廣其善小人資之以悛其不善助爲王

當陽縣補續志

卷四

藝文 清溪禪寺碑記

宜昌印書館承印

化豈小補哉智念稽顙闕下感恩弗勝復囑予記仰惟佛心天子膺上天之眷旣極其厚而其崇獎先佛之道又極其隆智念嗣佛教得際遇明時膺茲恩眷不獨榮於已而光於寺且有光於荆陽諸山不獨光榮於諸山而其天下國家嗣佛氏之教道者咸有光焉天恩至此復何言哉予聞智念克以至慈修已以實相待物防身攝心惟戒惟定故能感諸檀越而成善果也耶尙冀後之居是寺者不可視茲丹青土木之事爲人天小果有漏之因而忽其成功也知予言慎嗣之智念爲滇南人別號竟空有慧學於僧非貌而不心者也故併記之



義勇王墓記

明薛 綱湖廣按察使司

距當陽治西五里許舊有漢義勇武安王祠王之墓亦在焉王死於建安二十四年冬十月以侯禮葬此邑人祠而祀之創而隨廢者不知凡幾入我 國朝至成化三年僉事沈慶始謀建之知縣黃恕復請於朝賜每歲春秋二祭祭禮雖不缺而祠宇日就傾圮十五年冬福建姜君英來知縣事下車首謁王祠愀然嘆曰遍天下皆侈美王之祠廟顧於墓所乃如是乎遂捐俸爲倡 欽差鎮守太監韋公亦有白金之助經始於是冬之十一月落成於明年之六月僉謂有祠無文甚缺典也姜君英乃合一學諸生請記於予惟王之義勇絕天地窮古今者也豈予文所能暴白哉謹按史志所載以發揮其要旨之一二王當炎運衰微曹操虎視中原孫權雄據江東天下士羣然蟻附之不復知有漢矣獨王與涿郡張飛南陽諸葛亮同心輔劉先主雖流離患難不忍背棄下邳之戰王爲操所得禮遇之甚厚未幾立效以報操刺顏良於萬衆中奔馳歸漢君子謂王明大義有國士風及帥衆取襄陽殺龐德囚于禁威震華夏操議遷都避其銳當是時使權能知春秋討賊之義諭魯肅以曹操尙存宜且撫輯關羽之言益王士衆併力北向平定中原斬操首懸之藁街與先主中分天下漢吳相峙豈不韙歟顧乃聽信呂蒙舞智弄術襲王於章鄉王以誠信待人不虞其詐卒致敗死王死子平同死不二年而張飛亦死雖有諸葛亮之奇謀而力不能支矣非惟漢不能支權亦知唇亡齒寒無以自固卽上表稱臣

當陽縣補續志

卷四

藝文

義勇王墓記

二

宜昌印書館承印

於操而篡漢之謀成矣嗚呼篡雖在操實成於王之死權蒙之助也惜哉雖然自有天地來人生孰無死死而祠祀於一鄉一里者不可得於一郡一邑者尤不可得况得之於天下乎若王之祠祀遍天下雖婦人小子及四彝八蠻無不知王姓名壯王之義勇其視魏吳君臣之死重輕何如哉余又往往見王之祠廟在他郡縣者多靈異其在墓所者不言可知矣非英魂義魄千載不沒自有足以感動人者歟彼道家者流托爲天君天將之說是誣王也予因郡邑小民有感於此者敢併及之而爲記明成化十六年

重修武帝廟碑記

李鴻章 前任湖廣總督一等伯爵

當陽縣之漳鄉故

武帝陵寢在焉而建廟則始前明成化入

國朝凡再修之隆規宏基視他郡邑為最閱歲既久舊觀闕如所司文武吏大懼無以肅成祀典請加營葺飭材鳩工迺備迺固經始於同治七年八月畢工於八年四月 鴻章 適奉 命督軍於楚所司告成爰以記請竊惟

武帝浩然剛大之氣充塞宇宙其結聚於萬世人心者深固而光昭

國家崇德報功肇晉秩祀與天無極神明精爽春秋奔走將事不戒而虔舉天下胥同一軌矣而衣冠出遊之地昭假上下凜凜乎如在如存苟周旋承奉有未至焉匪特愴斯民追慕之誠曷以徵

聖代秩宗典禮之隆盛哉疆理所職其敬勉之而已用書緣起以告來者至監理之官出訥之數例得附書具列碑陰俾後世克考

當陽縣補續志

卷四

藝文 重修武帝廟碑記

三

宜昌印書館承印

重修武帝廟碑記

何璟 前任湖北布政使司

中條之山蜿蜒東南下越數千餘里至玉泉又東二十五里地脈復一聚隱鱗萃嶽為武帝陵故有廟前明成化時始建嘉靖時又擴而大之至我

朝康熙三十五年鄂撫年公重加修葺規模益備顧閱時既久稍就傾圮守土者以為憂屬軍書旁午戎事方殷未暇及也今粵捻盡殲南北底定 制軍伯相李公功成凱旋與中 丞郭公萃也求治百廢具舉念是陵廟為

武帝衣冠所藏神靈式憑不可以不葺 忝任藩條承命祇肅籌費八千緡有奇飭張倅東甲劉令宗元先後司其事以劉主簿繼燠副之經始於同治七年八月其明年四月歲事都人士礮石立碑請余為記余惟

武帝祠宇遍天下凡有血氣莫不尊親古之忠臣烈士無能及者蓋其剛大浩然之氣充塞宇宙實有以動人之敬畏故我

朝褒崇備極加以聖稱至與尼山比隆則人之瞻仰陵廟者亦將如登曲阜過闕里徘徊於子貢築室之場而興高山仰止之思矣然則是舉也匪徒以崇德報功其所以廉頑立懦者豈淺鮮哉爰恭紀其事俾後之人敬事無替焉

募葺橋引

楊州彥 已亥進士

權邑山水之勝在堆藍堆藍之勝在關壯繆廟廟貌踞危橋面瞰山容如屏如畫迨冬晚嚴寒枯木髮盡脫細看如初薙髮中間雜霜葉紅比春花奇禽怪獸雌雄牝牡之聲夜入人耳其最妙者門外珠泉或沸或靜沸之緩急以鼓掌之緩急爲節若乃大聲急呼山谷皆應泉聲亦復汨汨然其下若伏有靈物者但苦危橋一線未步先驚余每過輒令人前後牽挽趾踵相接促足窘步然已通身汗下矣今山僧來告云併危橋亦圯頗敗人遊興思欲易以瓦石索余一言因漫爲書數語倘此願竟成異日尋山君子穩坐橋頭下視清流遊空有魚盛暑中汲泉吞吐幸勿忘葺橋檀越也

當陽縣補續志

卷四

藝文

募葺橋引

四

宜昌印書館承印

蓋紫山募言

紫蓋山募言

楊州彥

余性僻山水每遇名泉峭谷輒流連不肯去或著筆記事不如其性情不止而於邑之玉泉青谿紫蓋諸盛勝復裹足不入謂人生壯遊當遍歷薄海內外援籐捫籬衝風浪以盡其態至筋懶力稀然後以一肩輿一奚囊坐臥於境內以自娛其老譬之富人子積錢役其子以存其母也云爾邇來流寓初還移居舊里遙望環城青山如黛乃復不自禁涉青谿水觀瀑布溜痕懸崖舊跡令人淒淡迤邐走鳥道往復玉泉老塔堆藍名泉噴玉不能自絕於其側因憶此兩境已移余情若紫蓋則道書三十六洞天當作何勝况及攜酒過之山容樸淡不令人喜不令人怒較前所歷似難伯仲遊之次日漸覺其氣象渾大蒼々莽々不可涯淡始悟曰此其所以爲洞天也大約于世運青谿晉魏玉泉秦漢紫蓋鴻濛于文章青谿諸子玉泉左國紫蓋六經于草木青谿蘭蕙玉泉菌菘紫蓋則老柏孤松已復登孝先閣周其左右少憩息其旁之前殿凭欄遠眺忽覺有橫生冷晃練帶平鋪曰此三峽之水所以下注江陵者也一線大觀周旋不舍則又意疾風暴雨嚴雪凝霜白應別開一界乃仰睇棖桷危崖落落佛盡莓苔未免敗人遊興和尚因計所以新之謂此殿創自余家屬余作疏以募於衆愧無以爲一椽助聊爲書此自笑曰書云弗肯堂矧肯構信哉信哉

雲陂寺疏言

楊州彥

雲陂寺初雲陂堰也陂卽堰矣贅以堰便土俗也汪汪數頃雲出於其中游於其中歸宿於其中若以陂爲家者故曰雲陂然土之人役乎水以作農務每夏月桔槔無晝夜搏激水勞矣勞則竭竭則陂中雲氣茫茫渾無歸所耆老之有思致者建寺其上額之曰雲陂存舊蹟也題名頗雅雲自是舍陂歸寺兵燹以來苔蘚剝落僧欲新之問疏於予予頗有難色僧謂予諸寺皆書其首何獨吝於雲陂予笑應之曰僕可謂歷書募疏楊家矣但予方以官通破產舊時數椽已經籍沒脫帽立風雪中無有以蔽天公蓋其白髮者今願與開士約余但作募疏名墨道人公老坐蒲團或鳴梆燃指號苦和尚寺幾聿新念陂原雲舊業名浮居士三衆同此一窩疎鐘疎磬茗椀粥鐺苦和尚任之田之旱澇浮居士任之四時之氣候遠山澹水一切奇禽怪獸草軟稻香可入筆力者寫不肖似墨道人之責也夫墨道人之責也夫

當陽縣補續志

卷四

藝文

雲陂寺疏言
水府廟疏言

五

宜昌印書館承印

水府廟疏言

楊州彥

涖之鎮當有明時佛刹不下數十區盡燹於兵諸開士欲新之其黠者自稱宿德博帶方袍持念珠作捧喝氣衆檀越畏而施或又燃指鳴梆曳鐵索以明苦行愚男女憐而施其或逐門合掌號韋馱尊者號至十許日復持緣簿寸步不離居士冷面飛霜和尚俯躬拱立見酒飢蠅趁人不去雖菜脯酒肆亦厭見怨而布施今諸刹咸新獨水府廟頽垣如故僧樸故也輪奐棟橈願力不及而瓦甕飄零霜雪不蔽每春霖秋雨佛與僧潭泥相依中途旅人徬徨車下其能以片瓦一笠覆此如來否

玉泉爲四大名山之一山林泉麓秀甲諸郡代有高僧倡教又有檀樾爲護法故當時名公卿文人墨士多遊覽題詠宗風丕振殿宇輝煌金碧琉璃諸珍異璀璨羅列方丈間允稱盛地歲月既久宗風漸微棟楹榱桷半多朽蠹憑漫而七寶佈施亦散佚無復存者予鄙性迂執生長玉陽年近八旬矣足跡未嘗一至邇聞心壽禪師主法席精嚴戒律兼工翰墨大昕課誦通宵跏趺面壁不啻九年也思一會以慰素志辛卯仲春邀邑張君四周率幼兒光常同赴方丈住宿一夕不獨山泉秀麗實符舊聞而師清高亦迥異習見因出素所珍玩諸物供諸佛前用致皈依並爲幼兒祈佑因囑師曰諸物存留方丈遞相傳守倘有點者竊踣他廟及不肖吏胥託辦差公務借用侵蝕不惟金剛怒目冥責難逃且顯有宰官護法必指名請追而主持方丈者亦難辭狗庇之責焉計十八羅漢像讚一軸仇英畫文衡山先生題高三尺三寸闊一尺八寸水晶古佛一座高七寸古銅香爐一座高六寸圓八寸煙結獅子狀大方鏡一面高一尺二寸闊七寸古銅小乳鐘一口高四寸圓三寸擊時音清而遠古銅插瓶一對高八寸圓一尺大青磁瓶一座高二尺圓三尺五寸插花青經久不萎雲起靈璧玉磬一面高一尺闊八寸擊則五音齊奏

當陽縣補續志

卷四

藝文

玉泉鎮山記

重修關廟碑記

六

宜昌印書館承印

重修關廟碑記

栗引之代

古今譚忠義它未能也輒曰關壯繆關壯繆彼其神靈所寄實有是不可磨滅者過墓則愴然廟則肅然像則樸樸然展拜之不暇先儒不云乎忠義者天下之大閑良心者衆人之素有惟彼飛揚跋扈甘心不宄一切不忠不義之事感憤於中而後人之望忠義也愈曲折而弗能去今上南顧未紓宵旰靡寧予奉天子璽書節鉞楚蜀荊州實惟建牙地近當陽之西曰章鄉古柏蒼松颯比風寒關壯繆侯墓在焉建廟請祀肇自明成化丁亥厥後嘉靖丙辰有修崇禎庚辰有修邑乘可考也歷國初三十六年無復有過而問焉者伏念此日屯住之荊州卽侯當日所借之荊州爰藉聲靈張我六師以定王國舉廟貌而特新之誰曰不宜於是與俞令君約廟因墓始墓壞弗治廟奚賴焉崇之封之衣以石檻題以豐碑妥侯靈也拜墓有殿左右禪堂輔之僧房稍下若正殿若拜殿若鐘鼓樓朽者去幽者亮工凡數易焉若正殿之東曰達旦亭西曰關平殿一仍之一易之客館行廚去平子殿不數武若承家有長子者然賓至其如歸矣若歌臺若馬殿弈弈偉觀次第及於廊房門堂門以二重較前增一而綵以周垣惟循舊址如其城焉足矣令君曰唯唯始事於某月某日越明年某月告成重修者有屋十餘間新建者有屋十有餘間糜銀以兩計千百有奇置田若干畝免其雜徭又以侯廟兩壁畫侯出處及行營按壘戰伐諸大事提刀上馬一副鬚眉英英若撼塵封矣丹青能顯其跡而今又過之無像者塑

其像有像者傳其神或樹以金石或屑以土沙墓前之寶鼎房中之祭品無不精且核也是舉也不傷財不病民中外異觀今昔殊視氣佳哉鬱鬱葱葱矣按三國鼎峙海內豪杰莫識所從多才如文若輩亦復如是侯從先主艱難辛苦數十年弱矣卒能轉弱而爲強事有不濟繼之以死罔有二心初何意由侯而王由王而帝之盛哉歲時伏臘走村翁人心之不死即侯生也余生平慕忠義人惟侯爲最著歿而爲神亦惟侯爲最靈方今劍浙戈吹師老民疲乃一戰而岳陽得再戰而星沙服西望蠶叢前途是倒 聖天子神武不殺實由如在之精英震疊而呵護之此修墓與廟曷能已已不然藐茲一撮土回顧西陵疑塚纍纍秋草含烟徒爲牛羊狐狸地耳孰是孰非自有能辨之者余竊有請焉平將軍與侯同殉國難請祀不及其子千古闕略良可浩歎政事稍暇封草特請春秋享祀添一卮酒俾父與子歡聚一堂不遂落寞不猶然我侯之志也哉是爲記

當陽縣補續志

卷四

藝文

重修關廟碑記
新建文昌宮碑記

七

宜昌印書館承印

新建文昌宮碑記

邑令王朝枏翰林院庶吉士

文昌爲先天孔子孔子爲後天文昌 國家祀典之隆所以與聖宮並峙也甲午春余承乏斯邑下車後敬謁文廟卽虔詣帝闕見傾圯特甚悵然久之越翌日紳士來謁稱工費不貲創董無主余因集邑紳廣爲勸輸視舊材盡腐乃徹底鼎新幸各總踴躍樂輸約費四千餘金文明之象遂與聖宮埒其始也以乙未五月越丙申冬乃告竣計建大殿一區拜殿一所迴廊三間殿妥神靈樓奉奎宿殿之東啓聖有祠殿之西住持有室樓之上北顧沮漳之環流西望青谿玉泉之拱翠紫蓋錦屏一覽皆小山水之秀乃盡得而收之先是廟在東城樓經兵燹遷此地面向形家言不利文闈都人欲迎還故處乙未春漢川壽田陳君署儒學事卽勸修本邑聖殿者精堪輿與地自吉向未善一轉移間卽與風水合今易南向者從其指也余竊以爲不然帝君之訓曰欲廣福田須憑心地是善言風水者莫君若也陰騭文一篇惟拜佛誦經印造經數語爲後人纂入其餘無非宣聖精義諸生崇文昌之祀卽當奉文昌之文而心文昌之心福澤者忠孝功名者陰騭文昌在爾心馨香在爾德雖無廟貌可也何風水之足云夫浮屠之架大屋養閑漢賢者不取而文昌之祀儒者不廢蓋以其文孔子也其神亦孔子也以敬孔子者敬文昌學文昌將來爲醇儒爲名臣區區科第又不足道卽以科第論於風水亦不爲無諸生勉之必有人文蔚起科第不絕者余喜其事之有成并樂序之以爲都人士勸焉

得蘭記

邑明經張致青 涵清

距城南五里有山臨清流境頗幽僻壬戌仲春始聞其上產蘭暇日從朱梅亭先生攜童持長鏡過溪尋之得數窠而實蕙也一幹一花爲蘭數花爲蕙前人辨之甚詳然玉泉西南諸山所產多一幹數花者其一幹一花者花青色無香葉亦柔靡俗名雞矢蘭又出蕙下矣是日暄暖少憩濃陰間相詫異茲山夙釣遊處松竹桃李外知有忍冬藤杜鵑花耳不意竟分屈子百畝芳韻也談笑方洽忽聞童子呼云有一幹一花而色白者予就視之葉較蕙差細三幹三花香風馥馥迺歡然大呼曰得蘭矣得蘭矣先生因謂山中未必止此及徧搜之無復有黃山谷言山林十蕙而一蘭其然歟已而莊戶某邀至其家予置蘭几上與先生以卮酒賞之笑曰何地無才但恐物色不到耳向不知此山有蕙無論蘭先生曰山且得名可稱蘭花予曰昔人云江籬蕙圃非吾偶竊嘗謂其峻而少通况今因蕙而識蘭何遽得蘭而遺蕙先生曰卽名蘭蕙可酒酣予起賀蘭曰君生此山中幾何年牧豎樵夫過之不顧而罹斧斤牛羊之患不知凡幾使竟不遇先生與予兩人其埋沒衆草矣先生曰此其所以爲蘭也寂歷空谷豈一切濃艷所能托根哉予曰今日移入市城奈何先生曰昔周子回迹心染辱及芳杜子不以一切濃艷待蘭城市猶空谷也予迺攜歸貯以磁斗沃以清泉恐久之而忘所自也特記之

當陽縣補續志

卷四

藝文

得蘭記

仲宣樓賦

八

宜昌印書館承印

仲宣樓賦 以登茲樓以四望兮爲韻

袁 瓚廉叔奉賢人

芳城千古畫閣三層屏開霞綺倚雲蒸無計消愁曾擲孤臣之管相期拾級好扶三尺之藤當年懷故國河山憑高獨望此地有詞人蹤跡訪古閒登其地則在荆山之畔沮水之涓闕荒闕而葺雉修高榭以蟠螭並無一點囂塵窗中列岫都是六朝金粉壁上題詩小小亭臺在白水青山而外年年萍梗聚騷人遷客於茲古屋經秋仲宣舊遊風塵羈客身世浮漚白下雲閒繞郭茫無歸路玉陽泉好出山可是清流看四時開落之花紅銷曲檻願千里鄉關之樹青入高樓庭戶雙閒奐輪競美晶箔動兮金飈涼玳梁耀兮彩虹起祇此數椽寄託幕且爲巢可憐兩字功名心真似水權依依旅邸總嫌去住無聊不比衡門誰說棲遲可以今則村柏園丹徑蓬翳翠重新楚塞之荒基遙溯侍中之故事莫問漢家宮闕已成萬劫之灰不如詞客門楣尙有三弓之地錦屏洗雨兮青環漳水涵春兮綠膩更誰作賦回瞻嶺路之千重好是居樓醉過花風之二十四是宜恣徘徊逞豪放遊情則眺入荒原詩料則供來疊嶂伊人不來老屋無恙樓頭鈴語爲傳往事之淒涼樓上酒徒也學古人之惆悵依舊是齊梁風月相約登臨此中留漢魏文章咸來瞻望有客羈栖江鄉路迷雨過引屐雲來作梯廋樓之清塵差擬樓之傑作堪稽不嫌滿地蒼苔爪泥偏印望見一村黃葉心事重提天地爲廬效莊子之逍遙遊耳鄉關入夢讀淵明之歸去來兮

徵君名映蘭號香晚晚號守拙徒家當陽之半月山余於同治歲甲子主是邑書院講席始獲識其人詢之都人士咸稱之嘖嘖焉徵君少孤事母姜安人能養志每母病輒先知之嘗於道光戊子秋宿闈中夢家人至以母病告迨歸問其期果如夢咸豐十年邑廣文暨有司舉徵君孝子中丞益陽胡公給額以嘉其行越三年登孝廉方正科年六十有五淡於名未嘗北上也每慨天下之營營於科名者實恆不足以相副徵君之孝發之於性天其愉色婉容皆流露於不自覺觀感興起一家則效之故長子婦張氏齋戒以禱姑疾次子婦李氏割肉以療翁疾與昔年徵君之事親也無稍異抑又聞之徵君多義舉如訂族譜篤宗誼也立族碑誌墓田也司公款以興土木無侵用弊也分米粟以濟貧寒無溺嬰患也道路傳述不聞有間言大學云身修而后家齊左氏傳云救災恤鄰行道有福余於徵君信之

贊曰百行之原首重夫孝蘊此一心用宣家教經籍有光發爲文章流聲庠序樂育於鄉言動視聽悉軌於正懿行上聞果膺徵聘排難解紛施棺給緡善舉無算里黨揚芬

當陽縣補續志

卷四

藝文

王孝廉傳

紫蓋山寺記

九

宜昌印書館承印

紫蓋上寺記

姜大閑 邑明經

紫蓋寺山道書所載三十三洞天也仙蹟之有無不可知而琳宮梵宇固爲山川之眉目靈秀之表章所以萃崎人廣道術故歷代不廢耳余世居南山之麓愛其林壑幽秀時往遊焉自南嶺逶迤而上得木魚山石路磬磽繞通人行下有小溪水石鏗然與本魚聲相和左右兩巒屈蟠而下若二龍之飲於溪者入山門過天王殿有銀杏二株大數圍蔭可十畝井一其水甘芳夏日憩息其下披濃陰漱清泉不啻羲皇上人正殿依山如屏兩腋袖繞上有大雄寶殿四字明光澤王筆東腋則觀音韋馱彌陀關帝四殿西腋則地藏龍王三官諸刹殿隅有泉名攀倒井昔仙人飲馬於此其水清澈大殿以後藏經樓尙存而諸佛一殿文殊普賢二樓今皆廢圯無在者其上爲白雲峯有孝先樓卽葛鉉鍊丹處今但存智井所云綵水甘馨無有也然上有雲氣雲籠山則雨驗之不爽俗云孝先跣行屈氏二女作履施之後分餌丹俱仙去又云山主劉綱樊夫人於此飛昇洞尙存邑志載綱爲上虞公與夫人較術卒不勝後皆登仙諒不誣也樓門有石碣余從高祖鄧川公所誌也公嘗設教於此及門多名下士先是觀察宋荊山公讀書是樓足不履地三年雍正己酉撥解去後余公國楠讀書其中乾隆乙卯中副車豈山川之秀靈有以發其奇歟抑人傑地靈有與爲不朽者存歟嗚呼玉泉不借壯繆龍泉不依文定二刹廢久矣則茲山之不朽者庸知非三公之靈有以呵護之歟而葛鉉劉綱之事迹其有無固

足深論也此寺肇基於晉慧遠師唐道悟栖禪於此後歸荊州天皇寺往時樹木極茂今皆童然矣山自青谿蜿蜒而來至此地忽止南北四垂如蓋林石皆紺故名紫蓋其前平原千里天日晴明江上風帆皆可指數唐宋及今名人題咏尤衆惜未刻石幢爲可嘆也住持僧修補破敗頗有功立碑殿西欲誌其源流丐序於余故書而刊之以見此寺歷年之遠靈蹟之著而發祥之奇居斯宇者宜何如愛惜也

當陽縣補續志

卷四

藝文

紫蓋山寺記

重修文廟碑記

十

宜昌印書館承印

重修文廟碑記

姚德銘石首舉人

至聖之祀之遍於天下也肇自隋唐之際歷宋元明禮秩有加焉逮我朝而尊崇之典至隆極盛邁越千古矣稽之令甲郡邑春秋釋奠凡有事於廟者宿齋預戒罔弗虔也俎豆簠簋登樽爵之數罔弗飭也升降拜跪酌獻之儀琴瑟鐘鼓簫管之音羽籥之舞罔弗肅也設之明誓以警其慢立之糾儀以繩其失其他秩祀莫得而並焉若此者豈徒爲委曲煩重以聳一時觀聽而已固將使習其禮者敬其身敬其身者修其業登聖人之堂則誦聖人之言行聖人之行毋或背而馳也是故廟制不備勸聖灑掃不謹則無以發其震動恪共之心而儒雅之士亦無所藉以爲蜚英騰茂之地此良有司之所憂而興廢舉墜之先務也顧今墨綬之吏更代既速又爲法制所牽相率苟趨目前爲應文逃責之術不復措意於實效六安李公藻臣作宰當陽一紀於茲矣當陽之俗尙勤崇讓號稱易治公益拊循而噢咻之漸摩既深皆有家人父子之誼歲豐人樂則爲之計長久自學校修脯之資書院膏火之助社倉預備之儲或創其始或益其舊咸飭無缺又念文廟締構未嚴剝朽滋甚懼無以揭虔延庠迺召邑紳爰諮爰謀僉曰公其造我曷敢有違於是庀財度工俾士之勤練者董其役殿庭門廡類水垣墉啓聖之祠明倫之堂靡不增飾易觀高者翼如深者奧如丹碧煥如瓊甍砥如經始於丁亥之冬至明年八月而竣公乃率諸生執豆籩駿奔走禮式無愆庠序益懋公之教不肅

而成與邑之人樂趨於善此其概也德銘嘗出郭門憑高以望連山西蟠不知紀極玉泉紫蓋諸峯標奇爭秀其脊脈蜿蜒起伏畢環城闔而止而沮漳二水交絡縈帶百餘里而後放乎大江峭然嘆曰壯哉縣乎清淑之氣之所鍾樸厚之俗之所留宜有瑰材碩士出乎其間而百年以來鬱而未發得賢令尹培養鼓舞振興之會兆於此矣諸君子其益務濯磨砥礪耀隋珠而貢荆璧上以副明心菁莪械樸之休下以揚良宰絃歌學道之化則斯廟之更新其猶吹回春之律而助爲山之黃也夫

當陽縣補續志

卷四

藝文

重修文廟碑記

十一

宜昌印書館承印

新建社會記

當陽新建社會記

姚德銘石首舉人

社者所以便民也而行之無法則適以擾民當陽舊社四十九社各有倉存穀共四千餘石經嘉慶元年教匪之變僅餘二十八社穀千三百餘石前縣尹鍾君以穀少不足備荒勸捐於富室皆於册者三千餘石鍾君迫於瓜代遂據册數上報其實書者未捐而可捐者未盡書也上憲以其存穀頗多歲遣委員盤查而民苦供應矣社無完倉倉無現儲吏胥藉端詰責而民苦嗚矣社長畏累則多方諉卸貧民有詞則指困強借而抵冒侵欺之訟日聞於有司矣是故當陽有社倉如無社倉且不便於有倉而便於無倉李公藻臣既履任二載集紳耆詢之曰吾聞興利不如除弊除弊以何者爲先僉曰社倉爲先因舉諸弊以告公曰將若之何曰請於城內建一總倉移各社之穀儲之公曰穀存各社貧民取攜甚易君併於城內遠鄉之民能沾此升斗之惠乎曰各社存穀實數不過千餘石耳豈能惠一邑之民而受其擾者不勝窮也今西單伊始不必遽言甚利但求無害而已公曰社倉與常平異常平在官社倉在民今一切以官領之得毋與立法之意戾乎曰往者晏中丞斯盛疏言社倉之法官不爲理而聽民自爲儲必無之事蓋利之所在衆必爭之吾邑有社倉數百年民不受實惠士人且避之若浼者以此官與民相隔而蠹蝕其中士與官不習而朋奪其權也今聚之於官以之平糶則出納有稽以之借給則收散以時以之存積則盈虛易核孰與在民者之漫而無紀乎公曰善旣又問建

倉之費安出則各社願任之問倉多穀少奈何則前書捐之冊尙存按冊而索十可得七八也計議甫定適奉藩憲檄查倉儲公喜曰吾新倉成可藉手上覆矣爰度地於文昌宮後廢圃建倉廩二十間虛其中半間以奉倉神正面三間以儲城內外之穀分兩廂爲東西南北以儲四鄉之穀其書捐各戶除無着者不計外節次催收得穀二千八百餘石合舊數共四千二百五十餘石酌定章程領以城內及四鄉社長守以倉夫公又捐俸三百串別建舖房三座歲取其租以爲修葺之費倉穀或借或糶則隨時消息官不煩而民不擾吏胥不得過而問焉蓋變通舊法以順民之欲凡期於救弊而已昔趙清獻越州拯荒之政曾子固記之以爲後法公令茲於今一紀惻怛忠厚不爲表襮而社倉之建息數十年不解之紛而緩急亦有所恃尤惠政之大者邑之人以爲不可無誌於後屬德銘爲記以勒諸石若推而廣之化而裁之蓋爲可久可大之模則有嗣任諸君子在

當陽縣補續志

卷四

藝文

新建社會記

十二

宜昌印書館承印

思樂館序

思樂館序

人才之盛衰係乎學校之興廢學校之興廢視乎培植之淺深當陽雖蕞爾邑而玉紫諸山鍾靈毓秀沮漳二水匯淑揚清其人才非不蔚然傑出也賓興膏火諸要務陸續舉行其培植學校者非不美且備也惟新生入學謁師脩贄無從出貧者既形棘手富者亦未易取懷往往爲學校之累蓋學師一席本冷署耳盤餐苜蓿潤色無資揣肥瘠而量厚薄探篋叩囊動多掣肘故寒峻之家每視詩書爲畏途雖子弟歧嶷亦多聞而生阻予目擊心惻已久思有以調劑之而未遑也歲辛巳奉 藩憲檄飭勸捐立款籌辦新生卷價予深喜向者有志未逮而今可藉酬也卽論集闔邑紳首量力酌捐設局收納不踰時而其款告成今歲春 學憲按臨諸生安受其賜禮敬學師者亦優渥倍昔頌曰思樂泮水洵哉其可樂也特恐積久弊生因爲策利病定章程詳請 上憲立案垂諸久遠由此後積有公款獲售者循例簪花既可安心以肄業後起者興言采藻羣將奮志而觀光爲師儒立廉隅爲生徒激志氣學校興而人才出將於是規焉惟是司局諸紳首潔已奉公惟寅矢志既和衷以共濟亦人言之罔恤衆擎易舉適觀厥成爰定章程付諸棗梨以誌不朽云是爲序

邑令李元才

六安人號藻臣癸酉選拔

重建主敬堂記

姚德銘

迴峯書院舊有後堂三楹爲院長燕居之所歲久傾圮 邑侯李君藻臣葺而新之規模加闊焉光緒己丑德銘應李君之聘來主講席李君告德銘曰是堂原名主敬其義甚富予不敢易也願君申其說以詔學者德銘惟夫子之訓曰修己以敬又曰執事敬夫人莫不有己己莫不有事能敬則事成而立人達人者已也不敬則事廢而自暴自棄者亦已也是故上自公卿大夫百官有司下逮農工商賈醫卜雜技莫不兢焉惕焉朝考而夕糾焉懼其事之廢而已將無所託也而爲士者獨若無所事然非無事也挾策而吟橐管而試習容止聯聲氣以其事爲外觀而已夫尊居四民之上異日將有公卿大夫百官有司之責其得志則繫天下之望其窮居亦爲一鄉一邑之表烏得肆然乎哉由一念之敬以至於無事不敬而道德功業文章有垂爲令聞而不朽者矣由一念之肆以至於無事不肆而般樂怠傲有流爲匪僻而不自知者矣然則主敬之道奈何易曰忠信所以進德也修辭立其誠所以居業也以忠信爲進德之本則不必高語性天而謹言慎行宗族稱孝鄉黨稱弟可以爲良士矣以立誠爲居業之實則不必矜奇炫博而毋剿說毋雷同稱心而言達意而止可以自處於不匱矣若夫矯情以干譽恃才以長傲實之不修而務求捷徑焉是皆不敬其身而自墮其所有事也故曰主敬也李君曰善請卽次其說以爲記君宰當陽一紀於茲其倦於多士也若父兄之於子弟故言出而人信之

當陽縣補續志

卷四

藝文 重建主敬堂記

十二

宜昌印書館承印

令出而莫或違焉然則德銘之說倘可藉君以存乎君屢捐清俸以助諸生膏火蓋惠政之一端非其舉舉大者諸生以爲不可忘也復別爲條記於後

永興菴堤防記

邑令董文煜 陝西朝邑舉人

縣之沮漳二河由南漳保康分流至溶鎮下五里合流直注荆沙匯漢沔宜昔左氏並江漢言之也顧二流未合時溶鎮上十里許名永興菴漳河往往溢出沮河致沮河以西沃壤廬舍每受漲溢之累而永興菴以下一經淤塞舟楫不通反廩斷流之憂豈非一水也由漳則爲利並入沮則爲害乎哉余蒞任初間嘗察其形勢先是道光十六七年間徐古心副貢廩請前任王讓生集士著諸紳耆修堤以堵之夫二河至永興菴僅距里許而漳河又高出沮河誠非堤不爲功第冲塌不時終不能無泛溢憂則在當事者之加慎耳己酉秋副貢復與諸紳耆由巡司張笙陔轉請於予予謂堤之成由溶鎮而論則河流利濟商賈輳集自是資堵水之利由沮河以西而論則人民安堵泛漲無虞亦復資堵水之利乃若溶鎮爲上下要衝一有阻滯則上下俱費支吾是又不獨有利於溶鎮與沮河以西也曷其奈何不慎爰與古心輩加意籌劃並親臨勸捐而督修之道光二十九年秋興工至三十年冬告竣是役也計費緡錢三千有奇至堤之纍石爲砥較前似堪永久僉曰不可無記爰爲述其顛末如此

當陽縣補續志

卷四

藝文

永興菴堤防記

十四

宜昌印書館承印

玉泉寺覺聰上人贊

賀 緘邑貢生號默亭

此燦然聰上人之小照也上人告予曰老僧持齋三十餘年所恃者一守字耳然老僧之爲此良苦人不知也予聞之竦然嘆曰上下古今化者幾人其賢人君子以及忠臣孝子義士烈婦守焉已耳而其苦又誰知之至若我輩讀聖賢書而立身一敗萬事瓦裂有甘受人唾罵而不辭者則未嘗此守字之義也因其言以自做而卽以此作聰公贊

五言古

乾溪望鬼谷

楊州彥邑進士

十日住空山獨坐尋山理曉起氣鴻濛山容得太始泄雲朝暮來明滅不可紀看山不看雲我心淡如水巉巖洞壑幽欲從鬼谷子老夫健不健溪乾石齒齒

夏日過玉泉寺

汪 墀字嵩臣

南陸天氣熇火雲滿空簇策騎來玉泉嵐光迎面撲納涼羽不休信步越山腹捫壁尋玉碑蒙然長苔蕨尚有黠畫存漫滅不可讀頰秀有遺跡誰能志興復鼎鑊三朝跡斑駁光離陸置身幽壑間俯首看衆瀑長吟梵閣中有詩盈卷幅何日却塵緣傍溪結茅屋

玉泉獅子巖

釋顯忠

世傳智者死一獸來蹲踞逡巡化為石埋沒在深土事怪固難詰但見形可取

關陵卽景

葉文在 愛梅邑副榜

駐馬自西來望鶴幾回首山色映龍泉丹鳳翔南斗四橋衛陵前行人似蛇走南無佛一聲虹影連雲數

西山雲

熊經璧 邑貢生

西山何崔巍雲常生其復有時如潑墨日夜響簷瀑有時如魚鱗同游不同族愁雨不愁晴望

當陽縣補續志

卷四

藝文 五言古

十五

宜昌印書館承印

斷農人目我今告山靈須為民造福雨久喚雲歸晴久驅雲出雨暘兩不愆高低皆大熟山靈曰不然雲本天所役天苟不降康區區安敢瀆天最惡淫奢其怒不可觸人人自修省豐年不待卜

玉泉道中遇雨宿顯聖祠

羅應箕 夢生東湖貢生

疾雨響前山震雷下絕巘青冥八九峯斜暉明望眼流雲壓頭黑勢與人俱遠谷轉馬力疲依叢暫息偃時見村人歸茅茨雞唱晚幽閒入上方驚問何處返閒忙兩懸殊自顧亦太淺平生江海心悵然罷夢緬

春秋閣

黃鳳鳴 教諭

漢季有真儒孤忠懷魯史當時懼亂臣千古如夫子呂陸不勝誅魏吳旋已圯獨留達旦心一炬無終始

方山晚眺

張致青 邑貢生

晚烟不上山低壓村樹平漁火忽墮水新月半溪陰客心正孤迥誰家玉籟聲

沮江行

袁 瓚 奉賢人

遍舟沮上行江水漂以急灘枯兩岸高木落孤峯立江河方日下斯世誰舟楫老我唱行行百感中年集

七言古

南山歎 為亡弟墨竹作

朝見南山青暮見南山紫自有宇宙便有此惜春眉目曲曲攢秋風松柏空丸丸草木榮枯皆波瀾波瀾疊疊春復秋高人勝士悲白頭憑欄空貯一腔愁

張致青

當陽水災

羅應箕

客從玉陽來憔悴無人色未語先聲吞使我心惻惻為言前日五六月沮漳頃刻成水國淫雨連旬注如盆長鯨老蛟縱橫萬落與千村人隨魚龍出沒日晝昏波濤洶湧盡為冤魂屯城垣崩華屋傾大木拔峯巒奔兩河上下三百里十家今有幾家存可憐六月初三夜風雨聲中萬弩射雷電滿空河水紅鬼魅喧啾相叱咤屈指十年兩遭毒丙子風伯雨師恐不赦昨聞長官申上臺陽侯雖害不為災四野漸看炊烟起吏胥相望打門來

玉陽晚泊 做柏梁體

袁 燾

沮水曲曲西復東相期破浪無長風十里五里輒一泊晚霞瑣碎餘殘紅慨我此行越三月堤柳半綠輕煙籠消愁且貰荒村酒掀鬚大笑推烏蓬山月出嶺霜華濃

五言律

百寶岩

楊州彥

當陽縣補續志

卷四

藝文

七言古

五言律

十六

宜昌印書館承印

單椒如寄傲寂寞一峯懸磧冷凝邊氣天垂入暮烟烏喧綠岸篠雲覆度溪船似有山樵路迢迢到絕巔

玉泉謁關祠

鍾 惺 提學

義勇歸何處凄然向此中始知真佛子即是大英雄邱壑延神理機鋒豁怨衷厭聞懷古者詞下說孤忠

紫蓋晨鐘 舊志已載二首

邑令 王朝枏

縹緲晨鐘起遙聞上界音名山傳寶蓋古蹟問禪林野鶴三更夢高僧五夜心聽殘丹井曉雲外響沉沉

龍泉夜月

龍泉今夜月皎皎翠微間印水潭千尺啣峯樹一灣歸僧初叩寺棲鳥不驚山文公荒祠在長此照松關

長坂雄風

長坂坡前路雄風憶趙雲臣身拚一戰主國救三分碧血凝芳草丹心掛夕曛况當橋斷處更有張將軍

錦屏牧笛

自昔觀兵地相傳此錦屏夕陽歸牧豎短笛放山亭村渡鴉迹黑峯橫積背青無腔吹信口明月照前汀

灞橋秋雨

石瀨水淙七涼聲落玉杠秋風長板路夜雨曲沮江旅客寒驚夢孤燈冷照窗明朝城北渡愁殺釣魚艤

金嶺朝煙

春烟何處重金嶺逗朝暉日帶晴霞上山含宿霧飛藍堆蒸縹緲紫蓋接依稀待看晨炊散花

秋夜題子方讀書臺

張致青

我聞唐御史宋代濟時才漳上讀書處山高乘興來西風惟落葉涼月有荒臺對境懷千古河流去不回

晚過長板

羅應箕

西風長板路戰血古今愁割劇千年事英名百代留滔七沮水急樹樹錦山秋落日班騅怨鐘聲出戍樓

當陽縣補續志

卷四

藝文

五言律

十七

宜昌印書館承印

七言律

天寧上人再新三星寺唐一行道場

楊州彥

寒泉漠漠覆苔青共說名山山有靈錫卓盛唐聞一行寺懸破額紀三星諸天次第開生面老衲艱難護祖庭孤磬乍傳林樾去野猿或抱石頭聽

余香山

熊經壁

諱國楠字千四邑副榜三月六日率鄉勇送糧至營爲賊裹入城中戕之同時死者文生郭其香等

弱冠英名領士林揆文奮武見胸襟誅蛟暫改雕龍手捫虱還憑繡虎心賊勢如風忽受困臣身似玉恥爲擒可憐指日飛騰客血染長衢玉樹沉

春日從耕心夫子遊西屏時偕同硯十餘人

張致青

不省西屏山路長石梯苔滑轉羊腸春風攜手二三子旭日放懷千仞岡市擁桃花茶竈韻檐薰麥氣酒帘香人家深處白雲遠却擬乘雲歸帝鄉

玉泉寺

羅應箕

桓碑大半蝕蒼苔知是人間幾劫灰塔影消磨新日月泉聲沆瀣舊塵埃英雄漢代靈猶在長老天台望不回笑問雲封山頂石能言定解說從來

玉泉早發

晨雞唱遠客心驚路出祇林避曉行萬木雲開分曙色一峯月落正鐘聲崖明野火樵初過馬踏空山鳥漸鳴慚愧老僧深夜語閒留餘日夢俱清

長坂

鄧光焱邑庠號菊菴

金戈鐵甲擁瑯弓直透重圍長坂中匹馬單槍扶幼主忠肝義胆逞英雄心寒百萬曹兵潰鼎峙三分蜀道通風散板前花草發猶疑豪氣吐長虹

丹井

峯盤紫蓋鎖珠宮陸地登仙憶葛公井汲雙泉和百藥丹經九轉透元功雪翻玉檻寒漿白月上金爐活火紅吐飯成蜂人已杳烟霞綠繞嶺西東

五言絕

登堆藍山望遠

楊州彥

踏到孤峯頂連衣臥石頭誰家橫嘯處山樹盡成秋

關帝祠

袁宏道

白衣豈至計陸豎偶成功天將移漢祚先忌絕倫雄

臥雲山八景弁序

張致青

當陽縣補續志

卷四

藝文 七言律 五言絕

十八

宜昌印書館承印

秋山當戶興來獨往得八景焉各綴數語以矢弗諉

迴風谷谷口有老松一株

語響空谷中虬松發清籟橫嶺勒風迴蒼翠落襟帶

半月池

小池貯清泉彎環如半月何當夜來遊滿輪照澄澈

玉筍岩

鬼斧削巉巖石笋明如玉泉涵苔草清風響玲瓏入

乳珠泉

靈巖有伏泉涓涓滴鐘乳明珠在深山把玩惟牧豎

瀑布影山水經岩石痕白如練遙望宛如瀑布

岩溜劃苔痕瀑布妙取影會應看飛流驟雨瀉山頂

石人峯大石如人者三

此中大有石丈屹然立蒼骨不知寒白雲爲宮室

涵石澗澗底皆石多蟹

寒澗曲折流水石相摩盪八月蟹黃肥誰能給清釀

護山溪 溪繞山足流十里餘入沮河

舉酒酌山靈幽人自來去雲壑莫教汚憑仗深溪護

隋鑊

大業年間鑊依稀字幾行可憐隋帝子猶得伴法王

玉泉夏日雜詠 錄二首

泉清魚可數石欹樹疑扶策杖人何往眠琴客未孤

疎磬雲間落幽花木末香小橋人獨立散髮世相忘

七言絕

韓石麓再寫玉泉

道人已寫堆藍寺復踏堆藍半餉歸雙腕不停圖此幅從前一幅却疑非

重住玉泉

不到禪堂已十年燃燈重會話前緣今宵低事眠難穩觸石泉聲落枕邊

夜半深山雨又過侵晨雨勢復滂沱開窗笑指堆藍處一片烟雲擁翠螺

龍泉寺 集唐

行盡山深又是山仙家犬吠白雲間煙霞寂寞無人到海內無如此地閒

當陽縣補續志

卷四

藝文

五言絕

七言絕

十九

宜昌印書館承印

古苔陰地冷霏霏斷續梵聲搖太微雲吐晚煙藏霽岫松間荷笠一僧歸

沮江竹枝詞

西南一帶稻田多水滿池塘草滿坡節近忙種忙不了村匕齊唱插秧歌
門前隙地盡栽桑蠶事春來戶戶忙五月縲車聲不斷新絲賣得好完糧

辛未冬擬來春讀書玉泉與燦然禪師

張致青

落拓青衿四十年麟經治就慕前賢文章尙欠神仙氣且伴高僧住玉泉
夢逐錫飛共此峯來春再倩白雲封肆書須借廚中葉愛客應停飯後鐘
擬住招提了世情梵聲清間讀書聲文心得似禪心定一片空明筆下生
一瓶一鉢共周旋和尚家風我亦然還幸塵中人未老同看明月照珠泉

漳上柳枝詞

曉風樓上語流鶯映日縮煙當戶明柳眉雖比妾眉細妾腰不似柳腰輕
露葉風枝裊裊黃朝烟影裏拂清漳年年二月春無賴結住離愁惱客腸

沮江竹枝詞

喻 賓 邑教諭黃梅人

沮河曲曲水長流水自長流儂自愁一葉布帆搖擺子載郎前日下荊州
種田怕種滋泥田居家怕居漳水邊水到春來容易長田因低處少豐年

當陽忠烈祠

經過馬首正斜曛野廟荒煙望不分八十萬人塵劫換英雄猶祀趙將軍

羅應箕

乾溪

冷七舊是水雲鄉不聽潺湲石髓芳一路馬蹄彈石子更從何處問津梁

楊國學 肄山

西屏山

懸崖千尺倚空青林壑幽邃此未經若個飄然日邊立白雲斷處是西屏

傅汝烜 濟臣遠安庠生

遊玉泉寺 同述齋談守先作

為訪名山結伴遊禪林深處喜勾留唐碑隋鑊真陳跡閱盡前朝萬古秋
巍七殿宇冠前南貝闕珠宮萬象涵安得智公長說法茅亭高結傍堆藍
鐵塔摩空莫躋攀神工鑄就鎮名山宜人更是橋邊柳煙雨輕籠舞翠鬟
詩餘

步鄭公堤偶成 蝶戀花

袁瓚

隔歲春光先一透紅了梅花綠了垂楊柳無計消寒須買酒岸頭問有酒家否 從此總宜杯
在手醉到明年酒國長春久閒向玉陽山下走敲門到處尋紅友

當陽縣補續志

卷四

藝文

詩餘

雜錄志

叢談

雙龍菴有猪羊二堤長半里高二丈餘舊傳石猪石羊常害民稼經雷擊而止現有猪羊形存
堤旁

同聚西河南人在清市貿易有年同治間歇業舖中人盡徙犬獨守門不去同鄉者憐其飢疲
飼之犬不食旋還舊所餓死市人義而埋之

隋大業間邑玉泉寺繪智者像勒石未得鑄刻碑自生文曰天地玄用出生六字或有磨刮其
跡彌光一境觀讀三日方失

康熙三十八年邑玉泉山釋鼻源塔旁生松一株高數丈枝幹垂布如華蓋其葉朝開夕合號
曰夜眠

光光十年夏旱荆門州牧陸及邑令李禱雨於玉泉夕卽沛然以應次年又旱邑令復禱亦如
之

補遺

堤防

趙家河堤紳首趙石麟郭蔭壽等重築也初堤高七八尺長約五六里庚辰圯於水一經春霖秋雨輒淹禾稼壞田廬居民苦之戊子春麟等稟請邑侯李公勘明捐資倡建數越月而功竣較前高數尺許長約一里有餘

廟宇

關帝廟在清溪鎮南乾隆二十年州牧舒成龍鼎建同治十年邑侯任道鎔重修光緒十四年邑侯李元才同紳首張向寅等添設大觀樓圍牆而規模宏敞美哉輪奐越歲餘而功竣

篤行

陶玉薰邑徵士賡唐之堂伯也生而聰穎性情高華其父學孔邑文庠殉嘉慶亂已載邑乘母詹氏內則素嫻紡績課耕讀薰弱冠以詩古鳴旋補弟子員友教四方成就者衆卒年六十八因乏嗣其門徒爲立墓碑敘及生平以誌之節錄長坂懷古警句云長坂坡前草自浮長坂坡下水自流當年血戰人何在古木寒鴉盡生愁頗覺淡逸有靖節家風

玉泉寺題壁兼贈寺僧金田

姚德銘

錯落千峯盡向西涼風翼我上丹梯蔽空行幄松圍逕震耳驚雷水到溪曲院幽深疑洞壑高

當陽縣補續志

卷四

補遺

堤防廟宇篤行

二十一

宜昌印書館承印

藁森竦拂雲霓一聲清磬聞根徹更乞牟尼照濁泥

當陽卽事四首

雨渚金沙耀晴江碧玉流川原極陶收烟樹蔚昭邱壤沃龍鱗接時清虎旅休棲遲念王粲訪古更登樓

其二

地僻衣冠儉年豐黍稌多山蠶勤女伴秧馬起農歌衆岫平如剪千邨密似羅樂郊尤可羨從不負催科

其三

西望天無極連山控上庸高雲盤隼鶻巨壑蟄蚪龍定有魁奇士難求隱遜蹤斜陽飛鳥沒延眺撫孤松

其四

見說堆藍好幽尋別有天仙茶駢乳洞靈響沸珠泉緬邈燕公筆荒唐智者禪何當營小築高枕攬雲烟

節婦

梁宗貴之妻劉氏事上以孝聞二十六矢志柏舟撫孤無力乃躬操井臼勤紡織以謀堂上甘

旨晚年家漸裕孫曾成立鄉鄰咸欣仰之現年七十有六

趙維昌之妻國氏孝傳之母也二十六節守時家道極貧寒氏矢志堅貞撫傳成立課耕讀勤紡織辛苦備嘗現年六十八

任朱氏邑庠潤生之母也二十于歸能得堂上歡心越六年夫故時祖姑病沾染床褥者十餘年氏事之無倦迨祖姑逝而翁姑又迭患痼疾氏奉甘旨治醫藥歷二十餘年無少懈教子慈而嚴卽潤生博一衿猶諄諄以正直相誠勉待人惠家不中資時解囊以助修橋諸善舉現年五十有九

趙全傳之妻郭氏十九歸趙甫三載而夫故遺腹子純元越三月餘始生也翁姑雖俱存而翁啞不能言家事無鉅細氏悉一身肩之現年六十其事孀姑也益篤

文章趙萬澤之妻楊氏十八歸趙事上以孝聞越一年夫故撫遺腹子士鏞以勤儉世其家現年六十二

趙維榜之妻羅氏係趙啓傳之母也年二十七而寡勵志苦守奉姑以孝撫嗣以嚴飲冰茹荼以終餘年卒年六十有一

祠宇

武廟香火田四十八畝在花栗總楊洲上每年收預支稞錢六十六串同治五年城紳稟請前

當陽縣補續志

卷四

補遺

節婦

二十二

宜昌印書館承印

憲阮立案勒石

思樂館

光緒十五年冬買屋一所坐落四總東門城內價錢三百串整每年完佃租錢二十四串整

賓興館

賓興公田舊志載官墾總陸家家田三分係學田撥入賓興每年完租銀十六兩七錢光緒十五年經管紳首察明坐落石斗改完預支陸家家田一分水田五石陸田二石餘草屋一所私堰三口東南北俱抵山嶺界西抵談姓田堰界每年完預支租錢十串學灣山田一分水田七石二斗陸田二石餘學墻一條瓦屋一所東抵趙姓田界西抵張姓田界南抵山嶺界北抵墻心界每年完預支租錢二十串金家坡田一分水田五石八斗陸田二石餘私堰五口公梅家墻一口瓦屋一所東抵馮胡二姓界西抵刺廟崗界南北抵江彭馮三姓界每年完預支租錢十二串整

當陽縣補續志卷四終

